

重修鳳翔縣志

第七冊

第七冊藝文下卷

墓誌

辨

說

啓


詩

祝文

跋

論

DS  
793  
S952  
F388  
1767  
v.7









鳳翔縣志卷之七

知縣羅鰲重修

藝文

制頌

誥贊

文碑記

狀傳

議書啓

賦論說

跋辨墓誌

祝文詩

境土之故風雅是傳或見經籍亦不重宣人所素習

無庸贅焉惟彼名士撫跡流連字藏錦繡筆吐雲烟

可資考鏡可壯山川須勤採輯廣恣漁畋登之簡策

照後光前志藝文



李茂貞封岐王加尚書令制

天復元年

唐昭宗

天有星辰爲之綱所以保乎乾健地有山嶽爲之鎮所以  
定乎坤柔故王者重夾輔之臣資股肱之任安危所係動  
靜是憑其在周也則姬公盡心於經營其在漢也則絳侯  
竭力於匡贊惟天所相何代無才厥生英賢爲我柱石拯  
茲艱運樹彼洪勲欲示褒旌爰加徽數具官某三光結粹  
二氣融精合鸞鳳之正音動諧律呂有麒麟之逸足迥出  
塵埃抱鐵石於寸心棲雪霜於勁節倜儻恢廓深沉溫雅  
允爲王國之楨實稟生人之秀自岐陽振跡隴右成功虬



騰周翰之間鶚立漢壇之上弓鳴霹靂劍躍蜿蜒指揮而  
川陸可回叱咤而風雲立變一居右輔累復皇都殊庸已  
煥於旂常嘉頌早傳於金石昨妖興肘腋釁起宮闈而能  
憤激衷腸密施籌畫致禁軍之貌武戮當路之豺狼安宗  
社於綴旒復乘輿如反掌人祇共慶華夏同歡旣而仗瑞  
節以來朝秉桓圭而展敬靜與之語簡而有常動叶生知  
克符中道披肝露膽皆本於至誠言發涕零必期於盡瘁  
感通天地激動人臣得不嘉乃竒功申茲異渥表爾優崇  
南省統率六宗尊大西郊封超五等在常時而難舉非盛



烈而莫當傑立羣倫光流萬代勉膺朝獎敬答天休可守  
尚書令兼侍中仍封岐王餘官勲並如故

贈故經畧袁應泰兵部尚書誥

天啓三年三月明熹宗

雲雷屯塞光日月者精忠天地風塵壯河山者正氣身捐  
而義不媿力盡而心已安崇爵宜頒幽貞是報爾原任經  
畧遼東兵部右侍郎兼都察院右僉都御史袁應泰嶽峙  
風標淵宏經濟壯志以天下爲任不避險艱熱心惟王國  
是圖無辭盤錯三十載蓄憤含毒六七輩護疾養癰當習  
款而盡撤其防卒不能玩之掌上迨挑釁而莫爲之備抑



且甘墮其殼中兵民騷動而忍恥偷生將士彌縫而喜逃  
懼戰議論日煩而墮任事之氣節制不一而分便宜之權  
以此久散之人心當彼方張之勁敵而爾擢自節鉞遂總  
專征統玄菟七百里戎莽之場提赤手十八萬枵腹之衆  
背城尚收夫三捷乘障莫禦其九攻奮臂力起瘡痍嚼齒  
誓靖烽燧至於仰天拜闕從容陳就死之詞閉閣投繯慷  
慨仗捐生之義付熱心於烈焰委俠骨於荒臺城亡與亡  
吾輩吾事自古豪傑固難責以成敗而於今封疆尤宜論其  
死生爰下殉事之旌特晉中樞之秩茲加贈爾爲兵部尚



書錫之誥命於戲朕於遼敗重嘆才難叩關航海之徒何  
無一人義士載寶輦金之輩並逃三尺嚴刑詎知事雖敗  
而以死殉事尚光在朝廷功歸社稷爾靈不昧服我袞綸  
歆哉

祭故經畧贈兵部尚書袁應泰文

天啓三年  
十二月

惟爾才優文武性篤忠貞方擁節於營州特急纓冠之誼  
迨提師於遼左夙懷裹革之思物論爭咎其納降爾實收  
斬馘摧鋒之用勝氣式彰於堅壁誰實豐開門延敵之端  
士潰馬奔勢遂孤於效死登陴蹈火義無負於殉疆報主



力窮遺表不忘君父守城志竭捐軀可泣鬼神加籩酌彼  
黃流起塚榮其碧葬承茲漏澤慰爾幽魂

石鼓文

周

甲鼓原文

音釋

文六十六  
十九句

重文十

共七十六字

避

本音吾讀  
作我下同

車既工

讀作攻古文  
省進擊也

避馬既同避車既攷

古文

好

字避馬既駙

音阜与駙  
同馬肥兒

君子鼎鼎

讀作爰於也古  
字通用下同

邈邈

讀

獵

鼎同旂當作

鹿鹿速速君子之求

帛

肉

音

弓弓茲

茲

以寺

當作時亦  
古文省

避毆

當作

其時

古文

其來趨趨

讀作亦  
行声也

趨

重文

文

四



趨𨔵𨔵

大來切今作  
臭煙塵也

卽邀

音卽

卽時鹿鹿趨趨

資昔切  
走兒

其來

大塗

音茨大  
道也

避毆其樣

讀作  
僕

其來趨趨

音獨  
走兒

射其獮

音豚  
或作

獮小  
豕也蜀

讀作屬  
古文省

今文

我車旣攻我馬旣同我車旣好我馬旣驛君子爰獵爰

獵爰遊麇鹿速速君子之求彎彎肉弓弓茲以時我驅

其時其來趨趨趨臭臭卽卽時鹿鹿趨趨其來大

塗我車其僕其來趨趨射其豚屬

乙鼓原文



音釋

文六十一  
一十七句

聖文七

共六十八字

汧

音率 水名 毆音緊 語辭

泛泛丞良

音皮 讀作彼 古文省 下皆同

淖

音潮 亦省文

淵鰈

鰈

作鰈 處上

之君子

漢

古文之 漁字

之瀉瀉

又

讀作有 下皆同 鯨作其

旂

當作旂

趣趣

走音兒

帛

作白 下同

魚鰈鰈

洛音

其溢

同氏也 亦古省

文

鮮黃帛其鱗

音邊 卽

又鱗

同 又

鯢

卽白

其胡

乞及

繇

卽商

之隻隻

生冀切 獸似狸也

沚沚

音洋

趨趨

音搏

其魚佳

讀作惟 古文省

餘下皆可

讀作何亦古

佳

似呂

佳鯢可以橐

音丁

之佳

楊及柳

今文

重參

文

立



汧絜泛泛丞彼潮淵鯉鯉處之君子漁之漫漫有鯢其  
游趨趨白魚鱣鱣其殖底鮮黃白其鰓有鮒有白其胡  
孔庶鸞之翼翼洋洋趨趨其魚惟何惟鱣惟鯉何以橐  
之惟楊及柳

丙鼓原文

音釋

文六十九  
一十八句

重文五

共七十四字

田車孔安鑒

音勒駟駟

何旦切與駟同馬行也

六帶

師上字

既簡左

驂旂旂

當作翻良馬名

右驂驂驂

音牽亦馬名

避以濟于遼

古文原避字下同

戎止阼

古文陸字

宮車其寫秀弓寺

讀作時古文省

射麋豕孔庶鹿



雉兔其遶又旃

未詳或作迎音循

其戎赳赳

音奔又音奏

大車出各

讀

洛邑之洛亦古省文

亞獸白奧

古文澤字

避執而勿射

叶音杓

多庶趨趨

的令

切叶音約

君子迪

音攸又音乃餘篇同

樂

音洛

### 今文

田車孔安鑒勒騂騂六師既簡左驂翻翻右驂驥驥我以濟於原我戎止陸宮車其寫秀弓時射麋豕孔庶麇鹿雉兔其原有迪其戎奔奔大車出洛亞獸白澤我執而勿射多庶趨趨君子乃樂

### 丁鼓原文



**音釋**

文六十九  
一十八句

重文三

共七十二字

帥良

彼

鑾車乘

讀作忽

敕速真

讀作填亦古文省

如秀弓孔碩

叶音式畧

切

彤矢笑笑

音簇叶音楚洛切

四馬其寫六轡沃若徒驥

舊本未詳恐是

駢字

孔庶廊

音廊

騎宣

古文宣字

博因

音首

車飢

古文載字

衍

古文道字

如徒如

章遙溼

同隰

陰陽趯趯六馬射

音石

之矧

音簇叶音撈

又有

驅

敕朱切似

狸

如虎獸鹿如豕台

讀作怡樂也亦古省文

爾多賢迎

音循

禽奉雉避

兔允異

今文

帥彼鑾車忽速填如秀弓孔碩彤矢笑笑四馬其寫六



轡沃若徒駢孔庶廓騎宣博酋車載道如徒如章原陽  
陰陽赳赳六馬射之簇簇有驅如虎獸鹿如兕怡爾多  
賢迎禽奉雉我兔允異

戊鼓原文

音釋

文六十六句

重文三

共六十九字

避來自東需

音零

雨奔

櫛古文流字

逆湧盈盈深

名當作漂

于既莽

即涉字

避馬櫛汧汧段洎淒沍士駕言囟

古西字

遘歸

字

方作舟自廊徒駢

駢

遄遄佳舟以衍

道

或陰或陽極

音

或作枝

深以戶出于水一方沍徒徯止其奔其敵且

讀作阻亦古省



女其直乃吏卽事字

卽事字

今文

我來自東  
雷雨奔流  
逆湧盈盈  
滌隰君子  
旣涉我馬  
流汧汧繄  
洎淒丞士  
駕言西歸  
舫舟自廓  
徒駢遑遑  
惟舟以道  
或陰或陽  
板深以戶  
出于水一  
方丞徒徬  
徨止其奔  
我以阻其  
乃事

已鼓原文

立釋

文五十二句

重文三

共五十五字

宣

猷乍

讀爲作亦古  
省文下並同

遶午周道迂

卽遍

我同

字卽

假除



帥晨

彼

阪田莽

白音莽或作莽居幽切

為世里希微憾憾

音直乃罟

黍

古漆字

纍

即栗字

柞

音昨

械

音域

其拔

音機

榕

音咎

庸庸

鳴條

即條字

亞箬其琴

音華

可

音何

為所

旂

音憂憂作夔

水盞

音戾

導言

古文

樹

纛

音幽

音

古文即

晤字

今文

宣猷作原作周導遄我辭攸除帥彼阪田莽為世里希

微憾憾乃罟漆栗柞械其拔撥榕庸庸鳴條亞箬其華

何為所旂旂水盞導旨樹幽晤

庚鼓原文

重修鳳羽錄

卷之二 文

八



**音釋**

文五十九  
一十五句

重文三

共六十二字

徒邀嘽嘽

他丹切馬  
喘息兒

然而師旅真

填

然會同又

如釋以左

戎律

讀作章

弓矢孔

甚也

庶

衆也

滔滔是戴

即熾字

射夫寫矢具集

即奪字

并

白音

拏

讀若刺

其徒荀

即肝字

來或羣或文悉率左

右燕樂

音洛

天子來嗣王始振振

音珍

復古我來攸

所止也

今文

徒御嘽嘽然而師旅填然會同又釋以左戎障弓矢孔

庶滔滔是熾射夫寫矢具奪舉拏其徒肝來或羣或友

悉率左右燕樂天子來嗣王始振振復古我來攸止



辛鼓原文

音釋

文二十三不成句

重文四

共二十七字

良走驕驕

未詳音義

馬麋

音標

皙皙

音華

雉兔

丑畧切

立

舊音位

多庶

微我師氏憲憲文武可何其一之

今文

彼走驕驕馬麋皙皙華華雉兔位多庶微我師氏憲憲

文武何其一之

壬鼓原文

音釋

文七十四二十句

重文七

共八十一字



避水既靜

與淨同

避導

道字通

既平避行既止嘉樹鼎

古文則

里

天子永受

古文寧字省

曰佳

惟

丙申旭旭杲杲避其旁

古文旁字

導

叶上聲

乘馬既迎

音循

效

音未詳夏康康駕辰四黃左驂

音敖

駿馬名

右驂

音速亦

戣

音盾兵器也

戟以奕女

讀作汝

不執憲

德旛旛

音翰義同

靈靈

音黎嶽讀作旛亦古

旛

旗也

施施

音宜旗動也

公

謂大來余及如茲邑周

即害字讀作曷何也白本誤

不余及

今文

我水既淨我道既平我行既止嘉樹則里天子永寧曰

惟丙申旭旭杲杲我其旁導乘馬既迎效夏康康駕彼



四黃左驂駮駮右驂駮駮戠戟以奕汝不執德旛翰黎  
黎旛旛施施公謂大來余及如茲邑曷不余及

癸鼓原文

音釋

文七十二  
一十八句

重文一 共七十三字

吳通人慈憐

𠂔同𠂔同

朝夕慈微

惕飢載

𠂔古文

飢北

勿奄

勿伐若而出奇俗作

進獻即獻

用特遘與歸

格至

執同

祖

告于大祝禘嘗受古文

橐古文

致其方

覲與藝

同叶

寓逢

串即中

𠂔古文

孔庶

麇

遘

溼

既坦

疆理

𦰩𦰩

讀作蕃

大

田不按當作

君子可

何

求又謀

又始

周爰

止于是



今文

吳人憐亟朝夕傲惕載西載北勿奄勿伐若而出奇進  
獻用特歸格執祖告于大祝禘嘗受享致其方藝寓逢  
中囿孔度麇鹿原隰既坦疆理蕃蕃大田不蒐君子何  
求有謀有始周爰止于是

按石鼓唐鳳翔尹鄭餘慶得於陳倉野中徙置鳳翔  
孔子廟五代間又復散失宋司馬池知鳳翔府復輦  
致府學門廡而亡其一皇祐四年郡守向傳師搜訪  
而足之大觀中徙開封南渡後金人昇至燕地元置  
京師文廟戟門下唐宋時石鼓俱在鳳翔故東  
坡以爲鳳翔八觀之一其文例得載入鳳志云

詛楚文

周



文通作秦嗣王敢字用告玉宣古宣字璧使其宗祝邵

藁希忠一作告於不顯大沈久讀作湫巫咸本作不顯大

神不顯大呂古以底底字楚王熊相之多臯昔我先君穆古穆

公及楚成王是讀作繆讀作力同心兩邦若古若壺古壺

糾呂古婚衿呂齊盟曰葉古葉萬子孫母相為不利

救古親印古仰大沈久湫而質焉今楚王熊相康讀作回

無道古道淫失讀作甚讀作亂古侈寔古侈從讀作變輪

盟刺內之檣文遇文作辜虎不姑巫咸亞駝刑戮孕婦幽刺

救古戚拘圉其叔父寘者諸寘室檣棺之中外之剽冒



改久心不畏

古畏字

皇天上帝及大沈久湫之光剝

烈威神字

而兼倍

倍字

十八世之盟詛率者

諸字

侯之兵呂臨加我欲剗

伐我社稷伐威我百牧

姓

求蔑瀟

古法字

皇天上帝及大沈

久湫之卹祠圭玉義

犧

牲取咎

我字

邊城新皇及鄒長教咎

不設曰可今又悉興其衆張矜忝

音府巫咸本作意籀文億字

怒飾甲

盛師以偪咎邊竟

讀作境

將欲復其貺

貺字

蹟唯是秦邦之羸

無敝賸韞

讀作韞

韞

音棧

輿禮使介老將

去聲

之呂自救殿

字亦應尊

古受字

皇天上帝及大沈久湫之幾靈德賜

古克

字劑

巫咸本作初古制字

楚師且復畧我邊城設數楚王之倍盟犯



詛箸石章曰盟大神之威靈

按詛楚文有三宋人初得告巫咸文於鳳翔祈年觀下次得告大沈久湫文於渭最後得告亞駝文於洛其詞畧同而道里參差無可徵信今祇存告久湫文一首爰依舊志載之以爲嗜古之一助云

禱雨礮溪文

宋府簽判蘓

軾眉山

歲秋矣物之幾成者待雨矣穰者已秀待雨而實三日不雨則穰者不實矣焚者已孕待雨而秀五日不雨則焚者不秀矣野有餘土室有閒民待雨而畊且種七日不雨則餘土不畊閒民不種矣穰者不實焚者不秀餘土不畊閒民不種則守土之臣將有不任職之誅而山川鬼神將乏



其祀茲用不敢寧居齋戒擇日并走羣望而精誠不歆神  
不顧答吏民無所請命聞之曰孰有周文武之師太公其  
可以病告乃用大禋之禮禱而不祀穀梁子曰古之神人  
有應上公者通乎陰陽君親師諸大夫道之而以請焉夫  
生而爲上公死而爲神人非公其誰當之詩曰維師尚父  
時維鷹揚涼彼武王肆伐大商會朝清明公之仁且勇計  
其神靈無所不能爲也吏民旣以雨望公公亦任其責敢  
布腹心公實圖之

禱雨太白文

蘓軾



維西方挺特英偉之氣結而爲此山惟山之陰威潤澤之  
氣又聚而爲湫潭餅罍罐勺可以雨天下而況於一方乎  
乃者自冬徂春雨雪不至西方之所恃以爲生者麥禾而  
已今旬不雨卽爲凶歲民食不繼盜賊且起豈惟守土之  
臣所任以爲憂亦非神之所當安坐而熟視也聖天子在  
上凡所以懷柔之禮莫不備至下至於愚夫小民奔走畏  
事者亦豈有他哉凡皆以爲今日也神其盍亦鑒之上以  
無負聖天子之意下以無失愚夫小民之望

禱雨太白文

明學憲

汪喬年

遂安人



惟神英爽赫濯德惠慈祥沛兌澤以噓枯代乾元而潤物  
顯唐著宋歷今日以爲昭考獻徵文實響應而如券載稽  
靈貺更僕難窮某備員秦中誼關民瘼乞靈干澤屢荷鑒  
原今夏去秋雨獲甘霖之應冬徂春屆欣承瑞雪之施銘  
刻無時敢忘祇事深愧未盡茲當考試見歷鳳翔伏思聖  
地乃境內之山川奈何下吏苦濟時之無具企瞻徒切登  
謁靡由遣使陳詞聊鳴愚悵伏乞洪覆恕此塵迷竊見仲  
夏以來數月恒暘秋苗絕望一切他種皆不能播播亦不  
生轉盼隕霜及期一年空度方今三秦之民餓殍盈壑流



離滿途壯者散而爲兵弱者坐而待斃將來日甚一日尚  
不知所底止某望切雲霓曾經懇禱合詞以請未蒙允俞  
自知下吏罪重愆深誠微禱數大福不再揣分難邀但滿  
目危亡束手弗忍且秋災已極粒穀罔收妄意罰可蔽辜  
冀留子遺於再造尚期善以贖過容偕吏民以自新更布  
愚衷冒干洪造伏乞俯憐危急亟賜甘霖使千里秦川俄  
覩盈疇綠漲百二關隴立看四埜青回目前長菜根以療  
饑日後滋麥畦而度命窮骨爲之再肉閭里不至無民某  
當省躬勸民改已過兼以改人之過滌愆向善勉爲仁卽



以廣神之仁矢終身而罔違詎食言而速戾至於崇修廟貌銘頌德功盟心曷渝惟力是視顯祈電察曷罄冰兢

乞封太白山神狀

代太守  
宋選奏

宋府簽判

蘓

軾

眉山  
人

伏見當府郿縣太白山雄鎮一方載在祀典按唐天寶八年詔封山神爲神應公迨至皇朝始改封侯而加以濟民之號府界自去歲九月不雨徂冬及春農民拱手以待饑饉粒食將絕盜賊且興臣採之道途得於父老咸謂此山舊有湫水試加禱請必獲響應尋令擇日齋戒差官泚取臣與百姓數千人待於郊外風色慘變從東南來隆隆獵獵若



有驅導既至之日陰風凜然油雲蔚興始如車蓋既日不散遂彌四方化爲大雨罔不周沃破驕陽於鼎盛起二麥於垂枯鬼神甚幽報答甚著臣竊以爲功效甚大封爵未充使其昔公而今侯是爲自我而左降揆以人意殊爲不安且此山崇高足亞五嶽若賜公爵尚虛王稱校其有功實未爲過伏乞朝廷更下所司詳酌可否特賜指揮

大盈庫租賦仍歸左藏議

唐門下侍郎楊炎邑人

財賦者邦之大本而生民之喉舌天下治亂輕重繫焉先朝權制以中人領其職五尺宦豎操邦之柄豐儉盈絀雖



大臣不得知則無以計天下利害陛下至德惟人是惜叅計弊蠹莫如斯甚臣請出之以歸有司度宮中經費一歲幾何量數奉入不敢以闕如此然後可以議政惟陛下審察

請豁除丁糧議

國朝邑令 舒向第

看得人土財用原有定額無奈時勢變遷以至流弊無窮若今日之鳳翔尤有不可勝言者試言其地鳳地稱中而糧稅重矣今荒山過於平壤而苦於輸納試言其人鳳民稱庶而戶口繁矣今死亡逃竄簿籍空存而苦於承丁以



言其財則生寡用奢而入不償出苦於四路衝要兵馬駐  
劄是鳳邑之苦倍於他境而鳳邑今茲之苦尤十倍於向  
時也竢竢孤才求救於水火不啻雲霓之望矣前據鳳翔  
鄉民楊允中趙光祖封王柱等連名哀籲以懇天憫念殘  
黎開恩減除丁糧庶活萬命事稟告卑職反覆思維呼天  
無力繪圖莫由幸蒙府憲檄批仰鳳翔縣確議報卑職細  
詢鳳邑士民遺老同稱鳳翔一縣丁糧在前明洪武原有  
定額賦薄徭輕民生易遂及其後世則有藩封祿米之增  
又有鄰郡協濟之增又有遼練二餉之增以及添站添差



鹽課紙價條條悉屬加增款款皆非正項原爲一時變局  
久成無窮遺累況今日屢遭兵荒之後罹兵刃而死者受  
徵比而死者轉溝壑而死者十分已去七八所存僅一二  
丁遺之民而丁數猶未大減一人而完四五人之丁銀小民  
已不堪命而地又非平壤每經大旱大雨山田易於傾頽  
平川又多衝削往時戶繁丁多歲歲修治尚可耕種自變  
亂以來山岡川地有壞無修而額糧不除故民間又有無  
地之糧凡此皆地方大害小民隱疾聽聞之下聲淚俱摯  
卑職於此實有不能不爲請命不忍不爲請命者矣查平



涼州縣多於鳳翔而鳳翔驛遞繁於平涼反爲協濟其幫貼彼處驛所等弊宜去也藩封祿米當日與王俱增自應與王俱減是亦其宜去者也遼練二餉原因添兵而加今日存之爲無名是又其宜去者也至鹽出山陝民各從便商有利而輸課民用價以食鹽秦民無課而鳳民獨代山西商人輸課孽作一人禍遺後世是更當比例而革者也若逃亡多則丁數少人丁少則田地荒而徵輸猶按簿而稽賠累責之現在窮民遺害尤爲深切今幸革故鼎新之會實拯溺解懸之機仰冀憲恩俯賜轉詳題豁大洗夙弊



則一時小民之感恩戴德卽聖朝萬世無疆之休也生靈

幸甚卑職幸甚

順治二年

請禁續親童養議

邑令羅鰲

男女天地之經得正則貴夫婦人倫之始有別爲先乃有  
鄉曲愚民罔知法紀兄死而弟入其室托言不忍外嫁可  
使治棲弟亡而兄收其妻假說不願離門樂與同夢續親  
之事罪孰甚焉夫老少尚不容求配況公然以伯叔稱我  
者而肆志淫污同姓且不可爲婚何居然以嫂婦屬我者  
而忍心瀆亂使生者含羞於閨閣死者抱恨於壤泉傷敗



彝倫大千國法至於男女婚嫁當以其時六禮未通卽云  
苟合乃有女家不顧體統或因度日艱難年未及笄而遣  
去男家樂於簡畧遂乘女家寒儉禮不必備而迎來童養  
之女雖未同牢然而幼相習而不相防或偷情而啓淫念  
或口角而肇爭端及乎擇吉畢婚早已釀成後禍將來閨  
門不謹琴瑟不調率由於此此雖未立科條亦恐有傷風  
化惟地方官長預爲防而明諭時申庶編戶小民知所儆  
而澆風漸息

請禁葬親演戲暴露少樞孩屍議



禮緣人情而制吉凶不得混同死以歸土爲安老少奚容  
異視喪葬之事於情爲戚於禮屬凶乃有不知禮義臨期  
而演戲者衰麻要經方擗踊於門中彩舞霓裳旋鼓歌於  
戶外大違乎禮奚忍於心甚有不爲親具一槨而夸耀於  
演戲幾臺意謂厚其親而不知戾於其親意欲免人笑而  
不知適貽人笑傷風敗俗惡習相沿所宜廣諭窮鄉以大  
加懲創者也至於少年身死容有歛入棺而不埋入土者  
委之路側日曬風飄棺縫裂開屍骸暴露他人瞥見猶且  
酸心况屬親人胡弗泚頰妄言早葬則凶不知本於何說



甚且血軀已腐付諸烈燄之中魂魄俱沉疑爲祟妖之作  
詎知行善自然免禍不因禳解之有方作非終究召殃豈  
以祓除之無術前邑侯任公深疾其弊曾爲嚴禁但愚民  
久而怙習不能痛改前愆更有嬰孩一殤遽棄原野徒果  
犬狐之腹不爲抔土之埋試思旣爲膝下兒孫暴露亦當  
不忍況是已身骨血委棄更復何情如此諸端均干法紀  
所望後來者先之以明訓俾覺寤者咸與更新繼之以常  
刑縱冥頑者能無向化

三良塚賦

并序

唐劉禹錫

彭城人



魯文公六年秦伯任好卒以子車氏之三子奄息仲  
行鍼虎爲殉皆秦之良也國人哀之爲之賦黃鳥君  
子曰秦穆公之不爲盟主也宜哉先王違世猶貽之  
法而况奪之善人乎是以知秦之不復東征也秋季  
月吾西遊汧渭出於岐雍之間於古道傍得三良塚  
心甚哀之涕泗者久之而去詞曰

昨宿岐城曉涉渭東霜凌雪結飛沙亂蓬中野躊躇屈此  
古墟野人曰卽車氏之塚方驅駕班如久而咤曰吾嘗讀  
舊史矣古者秦氏大於穆公出師則寧東夏用賢則霸西



戎大邦服其禮小邦畏其雄謀已集戰亦武不能勤王不  
爲盟王者何居以滅天之良喪人之特百夫仰系一朝而  
踣可哀也哉宛其三子遭時迤邐王已卽世身皆靡全指  
冥茫以爲期撫昭世而坐捐方惴惴以臨穴且哀哀而號  
天從有言於寒原莽蕩千里迴眺無垠上刺衰德下傷幽  
魂挂驂隴樹脫劍山門掇野芳以爲薦汲行潦而充罇矧  
今情之猶悲諒古恨之潛吞死而不作吾誰與言代事浩  
漻人壽爾天言念君子中心悄悄哀人生之長慟赴永夕  
之莫曉歸去來兮不可留且悲吟於黃鳥



嘉禾頌

嘉禾出邑人袁餉田

明邑令

李

榮

平定人

萬歷龍飛歲在壬子鳳產嘉禾一莖四穗觀者如市實爲祥瑞上陳直指慶其大有命載邑乘用垂不朽鳳翔李令拜手作頌其詞曰粵稽成周農事開國后稷肇封播時百穀公劉建邦廩倉是積古公遷居非擇而處文王治岐耕者九一武受天命悉付疆宇成后踐祚旦輔孺子無逸爾風告戒勤苦農殖嘉禾田畯至喜導迎太和享國長久自茲以還降年不永根本慮輕稼穡罔知五穀弗貴瑞應亦希皇明啓運誕生聖祖發祥淮甸奮跡隴畝柄持太阿祚



延三紀藉田躬耕賑饑恤苦和氣感召瑞麥兩岐青田作  
頌寶乘識之今皇嗣歷加惠黎元分陝以西疊罹凶荒羸  
轉溝壑壯散四方恭逢督撫提兵捍圉蠻貊率服幸邁惠  
文捐贖煮粥顛連乳哺方岳同心常平置倉道府承休節  
儉是倡岐陽袁氏慶積德門力抗權璫直聲振宇灌溉民  
田澤流中土維茲嘉禾實產彼畝一莖四穗觀者如堵詢  
茲黃髮前此罕睹嗟彼珠玉衣食弗能悼彼珍竒玩好是  
供維茲嘉禾利賴無窮實堅實好粒我烝民如京如坻長  
我王國際此豐亨式昭大有洗腆致酒孝養父母賦稅早



供酬答聖主黃童拍手白髮杖節社飲扶歸共享太平余

尹茲土深愧不斐作賦揚休以俟君子

明萬歷四十年

秦穆公飲盜駿馬贊

北周

庾信

駿馬遇盜秦王不嗔先傾美酒翻畏傷人鄰兵向國窮寇  
侵秦於時大盜還作功臣

李西平王畫贊

唐節度使李晟以平  
朱泚功封西平王

蘓軾

以吾觀西平王提孤軍自北方赴行在走懷光斬朱泚如  
反掌及其後帥鳳翔與隴右瞰河隍兵益振謀既臧終不  
能取尋常墮賊計困平涼卒罷兵仆三將誰之咎在廟堂



斬馬劍誅延賞爲菹醢不足償覽遺像涕泗滂

喜雨亭記

在舊府判署內今廢

宋 蘇軾

亭以雨名志喜也古者有喜則以名物示不忘也周公得禾以名其書漢武得鼎以名其年叔孫勝狄以名其子其喜之大小不齊其示不忘一也余至扶風之明年始治官舍爲亭於堂之北而鑿池其南引流種樹以爲休息之所是歲之春雨麥於岐山之陽其占爲有年旣而彌月不雨民方以爲憂越三月乙卯乃雨甲子又雨民以爲未足丁卯大雨三日乃止官吏相與慶於庭商賈相與歌於市農



夫相與忤於野憂者以喜病者以愈而吾亭適成於是舉酒於亭上以屬客而告之曰五日不雨可乎曰五日不雨則無麥十日不雨可乎曰十日不雨則無禾無麥無禾歲且薦饑獄訟繁興而盜賊滋熾則吾與二三子雖欲優游以樂於此亭其可得耶今天不遺斯民始旱而賜之以雨使吾與二三子得相與優游以樂於此亭者皆雨之賜也其又可忘耶旣以名亭又從而歌之曰使天而雨珠寒者不得以爲襦使天而雨玉饑者不得以爲粟一雨三日伊誰之力民曰太守太守不有歸之天子天子曰不然歸之



造物造物不自以爲功歸之太空太空冥冥不可得而名  
吾以名吾亭

凌虛臺記

舊在東街之北後人  
移築東郭三公祠後

朱蘓軾

國於南山之下宜若起居飲食與山接也四方之山莫高  
於終南而都邑之麗山者莫近於扶風以至近求最高其  
勢必得而太守之居未嘗知有山焉雖非事之所以損益  
而物理有不當然者此凌虛之所爲築也方其未築也太  
守陳公杖履逍遙於其下見山之出於林木之上者纍纍  
如人之旅行於牆外而見其髻也曰是必有異使工鑿其



前爲方池以其土築臺高出於屋之簷而止然後人之至於其上者恍然不知臺之高而以爲山之踴躍奮迅而出也公曰是宜名凌虛以告其從事蘓軾而求文以爲記軾復於公曰物之廢興成毀不可得而知也昔者荒草野田霜露之所蒙翳狐虺之所竄伏豈知有凌虛臺耶廢興成毀相尋於無窮則臺之復爲荒草野田皆不可知也嘗試與公登臺而望其東則秦穆之祈年橐泉也其南則漢武之長楊五柞而其北則隋之仁壽唐之九成也計其一時之盛宏傑詭麗堅固而不可動者豈特百倍於臺而已哉



然而數世之後欲求其彷彿而破瓦頽垣無復存者旣已  
化爲禾黍荆棘邱墟壠畝矣而况於此臺歟夫臺猶不足  
恃以長久而况於人事之得喪忽往而忽來者歟而或者  
欲以夸世而自足則過矣蓋世有足恃者而不在乎臺之  
存亡也旣自言於公退而爲之記

鳳鳴驛記

宋 蘇軾

始余丙申歲舉進士過扶風求舍於館人旣入不可居而  
出次於逆旅其後六年爲府從事至數日謁客於館視客  
之所居與其凡所資用如官府如廟觀如數世富人宅四



方之至者如歸其家皆樂而忘去將去旣駕雖馬亦顧其  
皐而嘶余召館吏而問焉吏曰今太守宋公之所新也自  
辛丑八月而公始至旣至逾月而興工五十有五日而成  
用夫三萬六千木以根計竹以竿計瓦甃坯釘各以枚計  
稍以石計者計二十一萬四千七百二十有八而民未始  
有知者予聞而心善之縣令胡允文具石請書其事余以  
爲有足書者乃書曰古之君子不擇居而安安則樂樂則  
喜從事使人皆喜從事則天下何足治歟後之君子常有  
所不屑苟有所不屑則躁否則惰躁則妄惰則廢旣妄且



廢則天下之所以不治者常出於此而不足怪今夫宋公  
計其所歷而累於勤使無齟齬於世則今且何爲矣而猶  
此官哉然而未嘗有不屑之心其治扶風也視其碗臠者  
而安植之求其蒙茸者而疏理之非特傳舍而已事更有  
小於傳舍者公未嘗不盡心也常食芻豢者難於食菜常  
衣錦者難於衣布常爲其大者不屑爲其小此天下之通  
患也詩曰豈弟君子民之父母所貴乎豈弟者豈非以不  
擇居而安安而樂樂而喜從事歟夫修傳舍誠無足書者  
以傳舍之修而見公之不擇居而安安而樂樂而喜從事



者則是真足書也

重修大金佛寺記

郡城東街

明學憲

伍

福臨川人

曩予奏績於京獲識大方禱上人於大慶壽禪寺見其所與往還皆名公卿貴人知其超然高世寬平而不忤質靜而無求有似吾儒之仁義蓋賢而與之遊者也上人本關輔茂族子幼出家鳳翔之金佛寺悟入禪學領其宗旨正統中遍歷諸山名藍與達門上首精修探賸所造益深乃之京師禮臨濟二十四代古淵濟公披剃又禮僧錄左街兼大功德王嵩巖壽公得度暨僧錄左講經兼大興隆寺



主質庵淳公俱得心印之傳遂卓錫慶壽成化初工部侍郎郡人霍公瑄以金佛名勝久廢奏保上人領剏住持而興修之一時中貴暨名公卿皆捐金貲樂爲之助復爲奏請兼任京刹福泉特恩賜金襴袈裟一襲以寵異之又三年上人始歸鳳翔鳩工聚材時陝西布政司左叅議汲郡李公奎鳳翔府知府許昌李公雄助修寺之正殿次及前後殿門廊禪堂雲廚咸剔其腐壞代以堅新牆壁加塗塈之功堦墀增砌甃之潔棟宇崢嶸金碧輝煌功旣訖躬請於朝仍勅賜大金佛寺額以歸郡人瞻禮晨鐘暮鼓頓還



舊觀今年仲春予適按節行臺上人來謁亟以記文爲請  
予知上人素烏乎辭按郡乘寺在城中府治之東僅里許  
前元大德元年奉旨肇建當時國師禪師凡十有八皆賜  
金玉銀印有差先是世祖遘疾時年三十有五範真金佛  
像一尊賜寺命國師供奉祈福像高尺許其重數與年歲  
等寺以得名元社旣屋國朝洪武初金像失其所在寺亦  
漸替副都綱悟真住持立與稍葺理爲僧綱司并以前元  
國師金玉銀印上進永樂十六年春勅僧錄司左覺義張  
達哩麻剌授就令副都綱善性住持正統初繼以副都綱



惠洪雖屢修葺皆苟且補苴頽敝相尋嗚呼有廢必興在  
人亦有待耶今上人以超然高世之資寬平質靜不忤不  
求佛名儒行何所爲而非善矧遭遇聖天子天涵地育之  
恩諸中貴名公卿敬信相與之篤興廢起墜易於指掌其  
賢信有自哉教典興崇宗風丕振上以爲國祝釐下以爲  
衆資福智燈長燄炯然獨照上人之謂也郡之名勝不亦  
增重乎用記其事勒之瑱珉以詔來者

明成化十二年

張默齋先生祠記

城東南穆公墓後今祠廢碑存

明

郭

定

長平人

先生張姓諱傑字立夫號默齋鳳翔鄭原里人父璉工部



主事以介直知名母王氏先生生有異質穎悟過人弱冠登正統辛酉鄉薦乙丑春中乙榜就趙城訓導或勸其不行者先生曰親老矣祿雖薄猶足以爲養卽遣人迎二親以老弗行累乞歸不報悉以俸入送親所父卒哀毀骨立葬以禮佛事一無所用鄉人化之旣終喪以養母不起母卒遂不復仕進肆力於學弟子從者日衆乃拓家塾以五經教授學者遠近悉至天順己卯巡按御史舉提學僉事成化乙酉應天府取典文衡俱不就辛卯巡按御史以幣聘先生攝城固縣學事先生復書其畧云古之學者從事



高遠求以明道也今專務辭章以決科爲事學曰疎道曰  
微僕不能爲也況鄉黨小子相從頗衆豈能遠及他方耶  
往先生在趙城時河汾薛文清公以道學名當世先生與  
論性命道德之旨文清深稱之東晉李泉秦州周桂金城  
段堅趙英輩相與論學無不稱服先生事親曲盡子道御  
子弟以禮法內外斬斬姊早卒養其子教之成立與兄英  
同居五十年友愛純篤未嘗有間言居鄉接人雖庸夫孺  
子咸得其歡心平生一介不妄取予冠婚喪祭悉依朱子  
所定家禮率子弟行之天順壬午關中大饑先生見以樹



皮作食者卽袖以謁憲副王公凱言民貧如此可不賑恤而坐視其死乎涕泣不能已王公納其言不待報發倉賑貸全活萬計嘗謁都憲陳公价爲言民有運糧邊方補賠破產鬻子女至死者甚衆愚民何罪而至是陳公曰我輩過也悉命罷之先生潛心於易續元會運世自堯之甲辰至成化戊子以爲午交未運時以爲有所見常自誦曰讀孔孟書學孔孟事知有未真行有未至惟日孳孳以求其所無負也成化壬辰十月寢疾卒都憲阮公勤高先生之行欲爲立祠提學憲副戴公珊命通判范君創始於家塾



之左今太守黎城趙君博來掄材陶甃工力悉備再閱月而告成祠堂三楹儀刑有像中外有門繚周有垣瞻仰肅然可供祀事矣趙君乃走幣令先生門人濟源尹進士張掖偕其子宁持狀請予記之

弘治八年

### 梁氏繼世孝行記

明歲薦牛澤邑人

梁孝子諱鑰字貫之家世鳳翔宣名里人大父曰準釣州牧也號正菴字叔平以葩經中永樂丁酉鄉薦越明年戊戌試春官登乙榜署山西石州學正姿質清粹規矩嚴肅先之以德行繼之以文藝門人有屢空弗給者恒捐俸以



助且精研醫藥活人甚衆晉人立祠祀之時乞歸養未及報忽聞母張氏訃擗踊號泣絕而復生時永樂某年正月廿有一日也卽日徒跣奔喪抵家營葬結廬塋域朝夕哭奠面墨骨立墓前羣鳥雲集飛鳴若助其哀號有新植樹甫三尺許鵲巢育雛其上墓側有狐如金有兔如玉鄉里異之明年禮科左給事中胡濙奉勅乘傳遍訪異人仍令錄孝子順孫上聞旌表以勵風俗抵鳳聞其事造塋慰問至再比還奏於朝詔授湖廣鈞州知州準固辭復奉詔勅禮部旌表孝子梁準門閭待廬墓終乃授湖廣鈞州知州



妻俸不管事專一提調武當山各宮觀奉祀神明其戶內  
子孫蠲免一切雜泛差徭卽糧草亦不許派徵如本家無  
人看守孝坊里鄰有能看守者亦與優免欽此遵奉旌表  
制終赴鈞半載以哀毀致疾卒於官鈞人水旱疾疫有禱  
輒應頌之曰生則格神死則庇民云子五曰純曰整曰確  
曰誠曰信信爲少子治家孝且嚴生子亦五鉦鋼鎡錦錫  
成化六年鎖以母趙邁疾歲餘湯藥親嘗侍不離側及卒  
勺飲不入累日旣而葬於城北雲臺坊祖塋乃於墓四圍  
築垣廬其中僅穴一隙以納薪水寢苦枕塊號泣如初喪



時墓竹有開花結實之異塋兆有文雞玉兔之祥服闋而考終於西河蓋成化九年也乃始出廬奔迎歸葬復居塚上哀痛愈切前後積六載更有巨蛇出入相隨若解人意遠近來觀者咸羨純孝所感少師默齋張先生先生之沒亦爲築室於場心喪哀甚居恒介以持已惠以及物邑人咸異重之稱曰梁孝子當道將以孝行入告鎖固辭曰人子奉親分內事也何以奏爲卒於弘治癸亥十有二月厥子浹亦居喪循禮正德己卯太守王公江纂修郡志附其行於曾大父之後嘉靖改元夏四月詔賜天下孝子冠帶



有司捧檄齎冠帶服色告祀邱壠榮及其鄉爰爲之記銘  
曰岐陽梁氏世孝彰聞條葉被澤况公其孫叔平苦節承  
恩於君及其次孫志行不羣維其頡頏永昌厥門於戲叔  
平之孝不可得而見矣而得見於其孫孫之世孝信叔平  
其不隕

嘉靖年記

創修岐陽書院記

東郭今廢  
爲三公祠

明制憲

彭

澤

蘭州人

知鳳翔府事任邱王公江涖郡之明年嘗閱郡乘歷屬邑  
謁周文憲公祠於岐山尋太公望遺蹟於寶雞之渭濱又  
得召公奭所遺之召亭於岐山縣之南得宋張子子厚祠



於郿之橫渠喟然嘆曰夫自堯舜之盛而至周公太公召公以行乎斯道者旣莫盛於岐周自孟軻氏沒至濂洛關閩大儒以明乎斯道者而岐周張子亦在焉是固孔孟之東魯周程邵朱之九江伊洛考亭也曾無祠合祀而啟夫後人非闕典歟乃謀諸寮案及郡之縉紳耆舊相度於東郭有寺曰寶昌者地形亢爽前拱南山左縈澗水足以爲奉神育材之所且茲寺不載祀典遂撤其佛宇僧舍之半有奇廣計若干袤若干繚以周垣中爲正殿六楹祀周之三公以橫渠配東西爲廡各六楹祀名宦鄉賢前爲大門



儀門各四楹匾曰岐陽書院殿後爲堂并東西齋舍各四楹以司教者居之爲長廊於南者六十楹以處受學者及庖厨之所規制嚴壯管繕堅緻像設器用罔不精完將上其事於朝而請列諸常祀且擇八屬教官學行精純者以任師道聚諸庠士學有次業者講學於是焉經始於正德己卯夏五月至是秋八月告成

正德十四年

### 創修縣城隍廟記

明進士周 易 邑人

鳳翔城東郭城合圍六里許居民二千餘家中有二郎廟莫識歲月殿像則剝落腐頽左右廊舍傾圯茂草東南文



昌祠西南縣城隍廟俱毀壞矣往來羊豕若無所主者萬  
歷丁丑歲晉衢王公來令鳳翔初之任卽齋宿府城隍廟  
朔望祭祀依太府而進退焉忽思曰國家設立郡縣守令  
各祀其神而鳳翔縣獨弗神祀於是按尋舊基見殿像污  
壞且規制隘僻慨然嘆曰官弗禮祀民無香火壓於府也  
乃以二郎神在上城隍神在下未達社稷人民之義何其  
舛訛之甚哉於是俯仰地勢宏闊嚴整靈秘坤珍可建城  
隍廟請於分巡桑公太府王公二公曰建之乃鳩工掄材  
經紀分次見稱鉤灣委棄大木百章申請桑公於是桑公



發俸銀十兩王公亦發銀十兩晉衢公自捐俸銀三十兩  
郡中士大夫羣樂贊成百姓踴躍趨役選里中良者司獄  
官李朝忠省祭官梁郡義民官李登光耆民劉壘曹士光  
陳已德田琢董厥事申畫示勸篤謀務成於萬歷六年六  
月二十日肇工築墉基二百丈立正殿六楹中設城隍像  
獻殿四楹寢殿四楹川亭五楹正殿東殿四楹曰子孫聖  
母正殿西殿四楹曰五瘟使者迤東南下廊舍十二間迤  
西南下廊舍十二間曰各司閭君左鐘樓右鼓樓二門四  
楹門東南隅各牆圍殿四楹祀文昌君門西南隅各牆圍



殿四楹祀二郎神大門四楹木坊一座四楹三空題曰鳳  
邑城隍廟自正殿以至門坊而體制而繪塑而級而隅而  
榮而序備矣偉乎郭城之壯觀也至次年十月二十五日  
工務告完於是朝忠等詣予請記吳峰周子曰正典崇祀  
豐功偉勲非夫離俗玩道英特警悟者烏能輕舉而宅之  
非夫冥揆遠寄篤信通神者何肯遙想而存之晉衢之建  
廟也上有以倡導下有以承藉不費帑藏而工舉不竭民  
民力而告成蓋所以禮神者必有所以安民者矣讀晉衢  
鳳翔事宜冊如議站銀等篇皆興利除害仁慈生心苦節



根性才華賦天不然民心厭棄神其吐之矣孔子曰我祭  
受福此之謂也夫古今豪傑垂功名於竹帛者多矣予獨  
以晉衢爲難能也觀風君子若引而昇之重權蕭曹丙魏  
之業豈足道哉今日令鳳翔者乃經緯之小康未可以料  
量晉衢王公也然斯廟也又令中之緒餘耳鳳民歲時伏  
臘祀神以篤祐王公也曷使人頌其義於無窮哉於是記  
之堅碣王公名明汲字原偉號晉衢嘉靖壬子舉於鄉年  
方十五歲識者稱奇童云陽曲籍京都人

萬歷七年十月

重修郡城隍廟記

明郡守

張

栴

安邑人



聖人神道以設教令甲天下郡邑咸得廟祀城隍鳳翔舊  
祀城隍神於城西北隅蓋寒門懸闕鬼谷之區崇陰義也  
古有殿五楹龍從蠱蠱父老相傳二百年餘矣殿之前爲  
今首殿不知何時香火盼饗於斯焉在而古殿年久寢  
頽圯余暨寮友王君輅韓君洪祚縣令李君榮展謁之神  
之尊嚴而上者穆穆然冠裾歲歲然垂髻而侍者閭易娛  
娛然簪筆而盼者或喜或厲眈眈然邪右鬼鬼露肘擢筋  
衣驅豹而立若擒若掣若咆哮而怒若躑躅而詈備諸恠  
狀得未曾有大都倣儻瑰琦殆非近世塑匠所能使謁者



敞悅神悸母不敬忍視斯殿頽圯安知神之在彼乎在此乎且斯一殿也昔胡以盼蠻今胡以頽圯興廢之感神人將無同乎是惡可已也僉曰然巫釐隄而請曰下里之俗刳羊輪革於廟歲得革若干計三歲之積若干請之官籍而存之買得皆若干是先郡伯趙公諱光大未竟之意也掌其籍者任持丁曇董其事者里老薛豆景際魁董治民也今幸累居積爲錢穀費爰以庀材鳩工倘興斯殿歟余曰允若是亟興之始營於今歲之仲秋越三月落成殿爲楹五仍舊若上而棟者若下而宇者攢立叢倚連卷櫺椳



疏櫺四布崔錯幡纚神之諸像咸飾金碧繪而陸離視昔  
加煌焉夫殿以神立神以殿崇謁斯殿也而如臨有赫不  
有洗心被志以承神庥者乎又不有面頰背刺心口自語  
改玉改行斬免神誅者乎上士以此神明其德而次亦兢  
兢於冥司之禁云神之嘿贊教化豈尠也則斯殿之興惡  
容已哉是爲記

萬歷三十九年十月

改作南門記

明進士劉九經

郿縣人

按禮諸侯之門制有臯有應有路天子則加庫加雉然見  
於春秋及孔子家語魯衛之國亦有庫有雉或謂以褒周



公康叔非諸侯常制在雅之綿古公亶父徙宅於岐作爲  
宮室門墉得宜應禮後世原本推功述而歌之其辭曰廼  
立臯門臯門有伉廼立應門應門將將朱氏傳曰伉言其  
高也將將言其嚴正也則諸侯之門維高且嚴正固詩人  
之所善與自秦罷侯置守則今之郡乃古諸侯之國而鳳  
翔又岐周舊邦也於全陝當爲壯郡獨人才出自科第者  
邇來蓋寥寥焉何不逮古昔甚乎說者謂府治前甕城門  
舊南向而今東也文廟前舊有小南門而今塞也以是故  
耳歲己酉冬十二月會安邑楊公黃岡穆公俱以天子直



指使者按部鳳翔垂意文教謁廟視學橫經校藝用作士  
志一時士用不應咸瞿然願化則以前說請謂改而之舊  
便維時憲司南樂李公以行省分守陪從實贊厥議皆報  
曰可而總其役於倅守巫山姚公俾底成之自三月經始  
迄今爲仲秋八月財不干帑役不擾民通力勸相工兢吏  
勸凡五閱月而告成李公以予爲同年進者又移書徵文  
爲記予卽不習堪輿家言間嘗反覆於綿之雅矣蓋周公  
追述先德告戒成王其前七章言太王始遷岐周以開王  
業後二章則言文王因之以受天命故其詩曰肆不殄厥



愠亦不隕厥問柞械拔矣行道兌矣昆夷駟矣維其喙矣  
又曰虞芮質厥成文王蹶厥生予曰有疏附予曰有先後  
予曰有奔走予曰有禦侮至文王一詩則專述文德用戒  
於王其三章曰世之不顯厥猶翼翼思皇多士生此王國  
王國克生維周之禎濟濟多士文王以寧蓋自大住宅岐  
肇建門墉有周風氣漸開故一代人文丕著文王得以攸  
寧然曰世之不顯則長育作成非一日矣械樸不云乎芄  
芄械樸薪之樵之濟濟辟王左右趨之言人才盛於械樸  
惟薪樵所用故辟王在上多士咸趨之蓋地之美者善養



不君之仁者善養士則世以人才歸之風氣不爲無謂矣  
於時在位鉅公念在容民畜衆計先興賢育才聞斯行之  
不憚改作甚盛舉也記惡可已竊以爲府治前城門南向  
取周行直達俾勿迂文廟前再開南門取崇文麗正俾勿  
壅推斯義也豈惟門哉誰能出不由門何莫由斯學也諸  
士生當岐周聖哲之里又承二三鉅公改作之盛知聖賢  
可學而至豪傑無待而興必當一意講明正學不爲流俗  
所沉溺學道愛人立達與俱一旦應舉不變塞焉則取以  
疏附而是取以先後而是取以奔走禦侮也而是真儒作



用與世俗宦達自別於以楨國寧王視思皇何遜焉若猶  
未也則不特科第稀少乃見乏才便令人精舉業魁名萃  
集吾郡以此徼時俗光寵誇耀閭里則可然不能濟世務  
而興太平焉能爲有焉能爲亡夫豈諸君所爲改而興起  
仰副在位鉅公者哉孔子曰過而不改是謂過矣科第何  
過過在阿世媒利耳此在心術隱微間而人不及知者故  
戒欺慎獨聖門屢以致意而嘆剛者未見也又曰法語之  
言能無從乎改之爲貴何以哉亦曰正其誼不謀其利明  
其道不計其功又說在孟子之論大丈夫矣是集義所生



者非義襲而取之也世固有家修而廷壞者豈有家壞而能廷修者率彼周行以正勿迂惟在今日願與君輩共勗而繫之銘銘曰維吾鳳翔彼岨矣岐文王生此多士濟濟鳳凰鳴矣于彼朝陽無競維人德冠三王我儀圖之今胡不然望不及他科第聯翩於昭鉅公時邁其邦何以禎國媿彼思皇爰究爰度風氣之故談言微中厥亦有素載闢離明爰復其處正焉勿迂通者勿錮豈惟門哉敷時繹思夫道若路何莫由斯聖非絕德文王我師翼翼心源文不在茲譽髦斯士無小無大九鼎十鼓羅列岐下今皇神聖



民莫是求望道未見誰哉分猷械樸薪標西土是道誰爲

詒者上臣所留

萬歷三十七年

創修尊經閣記

府儒學內

明進士

朱

堦

固始人

夫士民之標也文士之雉也雉彩所由振則風實鼓之顧風難言矣天地間漸靡成習者爲風俗動盪成聲者爲風氣凝結而成質者是爲風土土載氣乘俗而文則濬於土與氣之中者也鳳郡歷商周秦世爲天下雄其苞孕厚其發洩自宏所從來久遠故我國家成弘嘉隆間人文蔚起會解聯翩稱隆盛已邇來文明之風視昔稍遜郡守趙公



以部郎治其境慨然以作新爲已任謁廟畢視兩廡傾圯檄屬議葺治之復進二三僚儕及博士弟子員廉所爲沿革狀別駕姚公進曰凡物理宜陽鳴而陰肅城北懸鐘鐘金屬也司鳴居北陰向毋乃不可乎司理楊公進曰學宮居東南隅於先天爲兌兌爲澤澤宜下其應在西北於先天爲艮艮爲山山宜上今而前聳後下則水高而山卑矣山可使卑也歟哉博士弟子員僉云然會茶台王公按郡詣郡庠公因乘間以兌宜下艮宜上爲言遂議建層樓於其後茶台可其請於是下令鳳翔君爲之董厥事焉用是



偏者移之直者挽之塞者通之經始者因而營度之督民  
用衆者復稱食而餽廩之民踴躍歡趨不越月而事竣請  
命名於公公曰名以尊經蓋世風之變則人心爲之也欲  
淑人心莫如反經經常心亦真心也心之無膠處是謂易  
心之無邪處是謂詩心之無逸處是謂書心之無毀無譽  
處是謂春秋心之無偏無忤處是謂禮樂其情則喜怒哀  
樂也其德則仁義禮智信也其發於事則君臣父子夫婦  
昆弟朋友也其著於用則吉凶悔吝者之可以極深研幾  
也形骸性情者之可以收束蕩滌也民風政事僭竊者之



可以通達勸懲也經之所係鉅矣而可弗尊也耶學者誠  
顧名思義由經以會心卽心以明經將吐詞爲象爲文而  
濟濟多士其所經緯所節宣真與麟經爭烈矣矧提撕化  
導間諄諄反經常淑人心心薰而成俗俗盪而成氣氣摩  
而勁者調躁者靜戾者和且平土不以人易也哉異日入  
其國而撫撫然而雍雍然而熙熙皞皞然械櫜薪櫛寧得  
專美於古耶公嘉惠吾秦士者洵鉅且久非誌不朽恐後  
有沿流而忘源者爰勒石致頌頌曰維岐之陽丹鳳徬徨  
苞羽耀彩振我飛行厥功崇高樓臺煌煌厥澤淵深河泉



洋洋厥聲宏駿鼓鐘鏘鏘我報如何世祀無疆萬歷三十六年

君子亭記

東湖宛在亭南今廢

明關西道

張應福

魏縣人

鳳翔郡城外吳方有湖宋蘓子八觀詩載之迄今已數百年興廢湮築不知其幾矣頃予來巡察關西因慕蘓子文學政事得考究其往蹟滄海桑田惟是湖尚在規模湫隘無復爾時風物之勝湖南閑田十數畝中有基丈餘殆前人所欲爲而未竟者予因建亭其上北面是湖湖有蓮盈二三畝餘三方植竹萬竿翠蓋紅芳搖金戛玉岸渚交映良足怡懷亭旣成客有携酒而落之者遂請其名予曰君



子哉客曰何爲其君子也予曰夫蓮花之君子周濂溪嘗言之劉巖夫植竹記亦以剛柔忠義數德比於君子斯亭上下四方罔非君子獨不可以君子名乎雖然蓮之爲君子也夏秋之交亭亭之節不染之操盛矣美矣及夫秋老霜嚴草枯葉脫盛美者不可復見惟是竹也方赫曦而著蔭遇怒風而不折歷霜雪而嘗青小之可以備笙簧唱和於廟堂之間大之可以爲簡策永存於圖書之府蓮固不得以擬之於戲蓮花乘時效用之君子也竹則始終全節之君子也君子之處世因時以有爲久暫而一致斯無愧



於二物焉耳孔子嘗謂聖人吾不得而見之矣得見君子者斯可矣予亦謂人之君子吾不得而見之矣得見物之君子者斯可矣夫物之爲君子尚爲人之所願見况人之爲君子乎客肅然而退遂以名吾亭而鐫之石用垂不朽

云  
萬歷年間

重修縣學公署記

明進士  
袁應泰  
邑人

按鳳翔郡古右扶風地縣學建自宋元舊在縣南洪武四禩徙縣東北六禩遷府學右自正德十四禩郡守王公諱江者一重修之百餘年來堂楹齋舍傾圯久矣邇者尤甚



李公三晉名家公先大夫由進士守淮陽郡治行爲天下  
第一公能世其家博學宏才海內稱文章宗匠出宰百里  
初試鳳翔甫下車進諸生知學宮狀懼人才放失卽欲起  
而新之會邑值衝疲時逢饑饉百姓待哺方急豈得土木  
先撫字於是勵操持裁冗費清徭役復逃亡安流移給牛  
種墾荒田建社倉廣儲蓄葬枯骨施藥餌輕徭薄賦平獄  
緩刑一遇旱荒籲禱蠲賑至忘寢食學校更爲加意還冷  
局之馬價周匱乏之婚喪勤考課時廩餼建奎星樓濬文  
曲水三載考績四民尸祝兩院交薦行將報政天子乃出



贖鍰備物料選匠役僦卒徒計緡於官因工於傭地方不  
知有興作事歲壬子三月經營七月告成堂宇齋舍門坊牆  
雉翼翼噲噲巍然巨觀將必有豪傑士崛起于間學博問  
記用傳不朽余曰爾師爾弟子員抑知國家建學與李公  
修學之意乎逖觀往古有司徒胄子之教而後能獲真才  
漢設博士於太學詔郡國增學官舉孝廉故其治爲近古  
明興教先德行文蘄返樸詎不追往古而陋西京哉自教  
衰學敝士以飾章繪句爲匠心以入耳出口爲捷徑甚爲  
元虛鑿空之詞而先輩渾厚爾雅之氣漓矣如國家建學



之意何嗟乎文王周公非此地產耶孔明橫渠非嘗出師  
講學於此地者耶乃今遠不逮古豈惟二三子之差當官  
者與有責焉公之修學也若曰修學宮不如修學政修學  
政不如士子各修其身蓋望爾師以古先聖賢訓士爾弟  
子員以古先聖賢自待處爲修士出爲純臣庶不負今日  
修學意若師不知教弟子不知學鈞竒詭以倖科名是猶  
新櫝而忘珠老耳天下國家將奚賴焉噫此胡可令文王  
周公孔明橫渠見耶公之意恐不其然爾師弟子員其共

勗之

萬歷四  
十年



重修縣學公署記

明進士 袁楷 邑人

嘗觀孔子之道如日月經天萬古昭明無舊亦無新也而外此則不然物有毀也而成因之器有垢也而澣因之人心風俗有漸染也而濯磨因之皆新新不窮之意也古今來何物無舊何刻無新傳曰不有廢也誰能興之新之時義大矣哉而况學宮乎鳳翔縣之有學其來舊矣門宇堂齋不減於昔而歲月遷流風雨剝落漸致淪圯且學宮之後有敬一亭亭有肅宗皇帝御製碑先是因創奎星閣以培風氣並豎焉無何閣毀而碑與俱仆者數年會邑侯蘓



公來尹茲邑甫下車以學前坑窖有傷文運請命於道尊  
王公太尊杜公何公廳尊冀公王公僉允填補侯遂督工  
補修已而見學顏碑仆侯復慨然曰焉有學宮可以如是  
者乎起而新之皆吾事也獨無奈年歲褻歎流寇爲難干  
戈擾攘無處無之侯旦夕拮据曰惟以賑救生靈區畫禦  
寇爲安寧計幸而歲漸稔民漸甯寇漸寧遂捐俸若干毅  
然以重新爲事首豎御製敬一碑亭餘凡學宮之頽者植  
陋者緝蕪者堊傾陷者培補自門宇堂齋以暨衙署靡不  
煥然始事於崇正己巳之冬告成於庚午之春學博辜郭



諸君暨闔庠諸生等問記於余用傳不朽余曰爾諸生亦知侯新學宮之意乎夫言新者莫如易易之蠱曰先甲三日後甲三日甲者日之始事之端也鳳翔甲第湮晦六十餘禩則蠱而新之是在今日乃巽之九五爻辭又曰先庚三日後庚三日皆其變更而獲吉者也嘗試合兩卦之辭而繹之凡事有一不待更新者乎人事作於下天道應於上諸生試覩學宮之鮮明顧名而思義見博約之齋而文禮可任其湮塞乎觀明倫之堂而五倫可任其晦昧乎凜敬一之箴銘而視聽言動可任其闇習不光昭乎人事新



則氣運亦新學業新則科甲亦新六十年來湮晦光景重  
煥於今將紹明孔子之道不其在斯歟諸生唯唯曰上有  
好者下必甚侯旣以作新雅意修明學宮吾儕不爭自濯  
磨其何以副今日之盛舉於時文章事業彪炳一時遂應  
庚午鄉薦者兩人而繼辛未之鼎盛若有勃勃莫可限量  
者侯益暢然喜謂今茲之役果能上下相與以有成也侯  
綿竹人魁已酉諱夢蛟開誠禮士迥異常格且其學宮成  
而虜患息若昔魯人頌僖公謂旣作泮宮淮夷攸服其事  
適相脗合者是應勒石以垂無窮余故樂爲之記

崇正三  
年八月



創修試院記

明孝廉 程雲翼 邑人

興作非得已也故有創目前可喜之功不足垂百年君子  
不舉焉卽功可百年而或需歲月費不貲君子亦不舉焉  
何也利不百不輕變害不十不驟易可與樂成而難與圖  
始民情大抵然也若夫所事極其簡約收功最捷而垂裕  
久遠如太守纘聖王公建修試院之舉非有開物宏才恤  
民至性灼見利害之源圖畫百年於掌上者孰能與於斯  
哉且試院何昉乎曩昔學使者按臨之地相沿構木爲宇  
結席爲棚雖粗蔽風日而陰雨淋漓之患士苦之征繕催



呼之擾民更苦之自弘治中葉遂菴楊文襄督學關中念士民之苦修試院於長安拔士之尤者肄業於其中暇則羣聚講學號正學書院然惟省會有之他郡未有也嗣後學臺累檄各郡會所皆倣此以惜民費一時遵行營造者亦有之而鳳郡卒未有也閱萬歷戊午郡守芳揚沈公不俟僉謀銳意建試院於文廟之左爲慮良深士民到今俎豆邇來兵燹紛紜冠蓋往來如織館穀斯所者蹂躪而又且蕩燬焉則疇昔試院之蹟求其破瓦頽垣而不可得及學使者至首飭試棚騷動八屬百姓剝肉腴膏竭筋力以



充公家事竣則百不得一耳非飽胥役則化爲烏有矣弊  
日滋甚苦日相尋小民促生之事非一而此尤彰明特甚  
者也王公下車慨然以閭閻休戚爲已任百利具興纖害  
必滌岐陽三輔間業浸浸有起色矣偶詢及試棚溯其興  
廢之由曰嗟乎昔人易席棚爲屋瓦甦民困也今屋瓦廢  
而復蹈陋規民益殆矣誰實司牧乃重困此一方民乎但  
動大衆者分營之易爲力併營之難爲功與其彙屬邑之  
材力責成功於首邑孰若屬邑各營其材力鳩工庀用之  
省且便也於是經度布算已定呈請守道陳公轉請撫院



馬公皆可其議凡屋若干匠役之用若干衡州縣役上下而輕重額之其爲制簡便周至卽桌凳之繁瑣稽數千餘期整飭堅緻他可推矣以故衆心競勸計日報竣費半昔人而功十倍之易曰精義入神以致用也翼嘗謂不精義不能入神不入神不能致用公其有焉昔楊文襄由學憲入贊機密相業爛焉沈芳揚由郡守入典太常尋擢銓宰清操介節昭昭在人耳目皆能洞悉民隱剗修非常一勞永逸與民休息今王公循績久著至德造作人尤爲懇切鼎新文廟美富輝煌立會課士文風丕振又置資治通鑑



四書五經大全孝經武經諸書藏之學宮美政未可更僕  
數而此特其一端耳行將進秩卿輔炳烺史冊與楊沈兩  
公後先一揆矣故曰待其人而後行正待此開物宏務之  
人也是役也擘畫總理太守王公襄贊觀成別駕葛公司  
李周公鳳令董公及各州牧縣令而終始董率不憚勞艱  
不避風雨者則教授陰君坤生也落成而勒石以示永久  
而陰君適來問記於翼再四辭之不得敬撮梗概勉綴其  
辭俾後之君子知前人締造維艱軫民之意如此其懇且  
周也以似以續遞衍於無窮其亦政教之一助云

順治十三  
年三月



重修文廟記

明進士 袁楷 邑人

夫師之統烏乎始哉唐虞以前無徵不信不可得而考也  
帝堯克明峻德黎民於變時雍舜慎徽五典五典克從契  
敬敷五教皆師也故其書曰師汝昌言曰百僚師師彼其  
君臣上下皆師也而師不必有定屬武王曰作之君作之  
師故君非師不親師非君不尊君而師尊且親矣然惟亶  
聰明之元后獨任之於時師之統則在上不在下春秋以  
降政教凌遲彼其蔑君父如弁髦而何師之有於是師之  
統上下無聞焉漢以後受命作君者代有英辟試語以作



師必謙讓不逞匪惟不逞抑不敢乃羣推尼山之匹夫爲  
彝倫宗主雖天子執北面師事之禮惟謹然後師之有孔  
子如天之無二日民之無二王至於今二千有餘年若一  
日師之統乃定於一歷萬古而不可易故自京師迨郡國  
遠及邊徼縣道罔不崇其殿宇修其俎豆蓋代有興廢而  
禮無棄墜吾郡文廟在府治東南往崇正壬午夏文廟儀  
門燬明年冬劇賊李自成入關中又明年京師失守

大清主中原有司秩祀典如前代然文廟薪木毀傷棘生殿上  
梁木壞於頽垣講肆混於馬隊如是者十年於茲矣分守



道李公下車祇謁徬徨心怵大懼宮牆墜地以爲斯文羞  
急議鼎新壬辰夏知府王公尹茲土曰茲役弗肩時予之  
辜率知縣蔣公縣丞李曰芳教諭雷虹玉訓導賀紹美張  
懋興齊聲賢及邑之士大夫若而人僉謀廟中曰茲役也  
匪曰小補實用大作首任人庀材次之僦工又次之僉曰  
李曰芳諧曰芳遂自矢終厥事廣文諸君僉擇弟子員某  
某佐之或司出納焉或察勤怠焉卽卜吉矣作堵矣牆之  
土者甃矣棟之撓者隆矣覆之瓦矣且鎮其甍矣丹其楹  
矣朱其戶矣正殿功竣乃營兩廡如殿營兩門如廡文廟



之功咸竣是役也帑不支一錢里未役一夫如人家自構一屋廬其鄰里左右第侈其觀之壯麗而已成之神速而已至於木石費幾何丹灰直幾何餼糧何出傭募何繼其鄰里之人咸罔覺也先是估金動以千五六百計今費且半而功則倍之惟任使得其人而竣事遂不日也落成爲順治十年二月初十日越十日丁未安先師木主舉祀事如禮訓導賀君齊君率弟子員詣余曰惟茲大作豈曰小補需先生文之余曰夫新廟之意何居曰吾儕由一命迄登公輔無不由茲廟也以出此役也其庸有報志余曰是



固然矣然而其意也私曰府縣兩庠自壬午以後聽鹿鳴者寥寥山川不殊風氣爲咎此役也其庸有類應余曰是固然矣然而其意也狹君不見日者上丁有事於廟乎太宰夙夜惟寅執事盼饗如在牲肥腍酒馨香其未薦也顯若其卒事也莫愆諸弟子員六七百人凡在廟中者肅然如覩溫良恭儉讓之輝光焉諄然如聆文行忠信之四教焉問壬午以後祀事有諸乎蓋廟貌新則耳目易則寅畏生寅畏生則嚮往切嚮往切則效法殷夫使人皆效法孔子是則新廟之意端有在於此也且所爲效法孔



子者豈如今誦其遺經爲巍科尊官媒耶古云三不朽稽古克兼惟孔子一人學者得其一卽堪不朽是則效法之意端有在於此也昔者願學孔子之言始於孟子彼其居甚近而世未遠何殊見知宋有周程張朱諸子去聖人千五六百年其人則異矣明有薛胡陳王諸儒復後數百年其人則異矣皆入聖人之室升聖人之堂彼所謂豪傑之士今之列祀兩廡者其人也豈非效法孔子有爲者亦若是與寧獨使君新廟之意有在於是卽歷代欽崇之典不亦職此之由歟予曰惟李公王公有功於斯文詩不云乎



奕奕新廟君子作之賀君齊君曰惟先生之文善言新廟之意詩不云乎他人有心予忖度之乃復之二公而鏤諸

碑

順治十年二月

重修關王廟記

明孝廉党永邑人

余嘗讀三國志見漢壽亭侯之事昭烈者義勇絕倫未嘗不三復歎也夫當靈獻末造炎精欲熄而曹操者奸雄蓋世者也稔惡無將窺竊漢鼎而昭烈蓋帝室英胄也顧念皇圖隱切宗祊雖無密詔猶欲誅曹况詔之耶及董丞事敗謀不果誅則操欲誅備猶腹心之蠱也計必撲滅斯鼎



可堅據耳夫備人傑也蓋負霸王之畧而能甘原廟之毀  
乎故奮臂徐州昭揭漢幟義植赤帝之簾也存本之思也  
當是時卧龍未起孤君新造其所以羽翼昭烈犄角曹瞞  
進退周旋不避艱險則惟侯與翼德耳侯謂許身昭烈也  
豈誑言耶及操獲侯於下邳優禮羈縻謂可用以滅備然  
白馬報効橫槊歸漢雖操之鬼蜮亦知義之侯何爲者也  
夫侯虎視天下者也其委事昭烈欲翊戴漢室以光帝業  
也恨不誅曹耳肯爲曹用耶蓋至於赤壁之勝庶幾乎發  
舒英雄之氣矣控制荆襄威振華夏操議遷許以避則侯



已懾操之魄侯豈畏於人者耶惟時漢道有可興之幾而侯之所以輔昭烈亦庶幾次第可觀已彼孫權者操黨也恐其併已而詭以襲侯侯斃而漢事乃去此千古遺恨也君子曰操漢賊也孫權尤真漢賊也其說是矣而槩謂侯輕敵玩寇也固然而豈其盡然耶嗟夫當長陵氣消卯金運替四海鼎沸妖氣煽宇豪傑之士皆竊附奸雄以苟於時無有義嘯漢燼者雖以荀氏攸或且委質於操而不以爲汚况他耶獨侯之於斯忠憤激烈非昭烈不事蓋與孔明同規其趣向正矣較諸文若不猶神龍之與蝦蟇乎嘗



觀辭操之書曰日在天之上心在人之內察其用心直欲與日月爭光類非健將能道者是於君臣大義蘊藉春秋其識達矣宜乎其英風勁節視權操不啻鬼魅而不與之同倫者也故周瑜嘗謂孫權曰劉備以梟雄之姿而得關羽張飛熊虎之將必非久屈爲人用者蛟龍之喻非諛也蓋畏之也瑜可謂畧識侯者矣彼陳壽者謂侯以驕而致禍是以瑕議玉管窺天也何足知侯哉故鼎峙之業昭烈所以綿漢祚者侯將而武侯相也亮明於治國而爲相侯勇冠三軍而爲將其所以不能恢復者天也非將相之咎



也而世顧以成敗論人也殊淺淺耳歿於建安二十四年十二月迄今千四百載而祠宇遍天下蓋侯之忠義貫天下古今故天下古今以忠義祀侯非偶然者若權操輩雖以狡詐割據一時而忠臣義士展卷瞋目其視侯爲何如郡舊有廟在城東門內日久而敝鄉人楊維輩好義人也醵金而新之廟貌旣成用刻余文

嘉靖年間

重修縣學公署記

國朝明經

程上瑞

邑人

鳳翔關西首邑古右扶風地其民敦龐其士質靜縣有學明初建於郡城西門內後卜吉於郡學之右門堂齋廡規



制宏徹迨閱歷滋久繕修弗繼兼以兵燹邇來宮牆堂室  
日就傾頽太守于公邑侯蕭君下車於軍興旁午之際視  
學日目擊茂草無以副朝廷養賢育才之意因嘆曰首邑  
膠庠上之所以立教下之所以成德其爲政體之重且大  
莫有先之者可聽其傾圯而不加修葺乎遂慨然捐俸購  
材木置工料還質諸關西首藩劉公又申詳督學葉公撫  
憲杭公咸可其舉爰鳩工庀材筮日舉事其重理則署教  
諭舉人蒲城徐君流金其告成則署教諭舉人富平仇君  
延祉凡湮者濬之蕪者芟之湫隘者爽塏之繚以周垣望



如引繩若明倫堂若大門壯麗崢嶸若師舍若齋廚比次  
嚴整將數十年廢址一旦修舉而午未卽鄉會聯翩詞林  
蔚起猗歟盛哉多士佩戴于公蕭君之德之功徵余爲文  
記其巔末余旣不敢辭然余於學之修有感於士之學也  
夫區其齋房立之師傅昭其儀物具其廩庖是有國者之  
立學也葺其敝壞新其圯墁給其匱乏警其弛怠是有司  
者之修學也均非士之爲學也士之學學爲聖賢也道德  
以爲地忠信以爲基仁以爲宅義以爲路禮以爲門廉恥  
爲垣牆六經爲戶牖求之於心而無假於雕飾也措之於



外而無所不統該也一代之學皆此矣我國家雖以科目  
取士而立學之意亦豈能與三代殊是故學期於聖賢他  
日出爲世用將廟堂獲得人之報生民食大儒之福斯無  
忝於爲士矣况多士生遭文盛之世躬逢維新之學其觀  
感興起必不屑以凡民自處而以聖賢自待者行將蒸蒸  
起也若止爲苟取功名之階蚩緣利祿之梯所謂學無負  
於士士有負於學矣何以稱郡伯邑侯德造作人之美意  
哉願多士共勗之是舉也鳳郡同僚樂贊成者通判濟南  
吳公滋陽韓公經歷江右余君國章司獄鄞縣陳君維願



縣丞趙城高君尚典史旌德田君生玉協鎮都門許君捷

城守守府德州蕭君維晉屯營都司王永正並得勒石康熙

十六年  
七月

重修宋橫渠張夫子祠記

郡城東街

國朝太史李因篤富平人

漁陽曹太史來守雍郡之明年疆事既寧時和歲稔乃召

佐吏凡事之有裨於民者振舉維序而首割俸若干緡葺

張橫渠夫子祠蓋先是公蒞任之初齋宿謁聖廟次拜祠

下訝其日圯也又肖象某某守宰於旁楹守宰雖賢不祀

官祀地新鬼八故鬼去非類而附不以居歆矣爰撤爰熙作



承用安卜牲練日將大會邦人落之適因篤至自荆原授  
簡使紀厥畧敬述公意告多士曰關學之興肇端張子文  
武周公而後西土言聖人之道者莫之能先也夫子歿而  
微言絕七十子喪而大義乖歷七百餘年而始得周元公  
倡不傳之遺緒河南純公正公皆親受業拓而大之而張  
子爲二程中表尊行首撤皐比力相推挽徽國繼起遂集  
大成蓋自是內聖外王統合爲一天下之言學者論地則  
四論人則五四海之廣千百世而遙較然於此心此理之  
同循循知所依歸卽孔子孟復生不得有異議何者出乎仁



則入乎不仁故君子慎之也往嘉靖末姚江實本鵝湖樹  
幟良知彼天資旣高危言駭俗又負大勲於當代據建瓴  
之勢號召其徒聞者如飲酒中狂趨之惟恐不及而吾秦  
高陵三原爲經生領袖獨恪守傳註不變於斯時也關學  
甲海內嗣則孫恭介溫恭毅皆比老畷服田弗敢畔於先  
疇而耨耨之功長安馮恭定尤著溯其源委以張子爲百  
世不祧之祖諸賢各自繩其小宗而彙几筵列俎豆亦一  
而已矣夫張子之祠學宮通之天下西安祀之國而鳳翔  
又鄉祀也愈近則愈親祀之宜專禮鄉大夫之賢歿而食



於社况大儒崛起功在作述者乎且今之言陸王者吾懼  
焉百家之說明背聖人其邪正易知也周末楊墨充路孟  
子辨之不遺餘力而僅勝之今援儒入墨陰勦內典希微  
恍惚莫可究詰而間摘語孟中有爲而發者借作門面揣  
其意固自竄於象教而聽其言仍不離乎聖賢程子所謂  
彌近理大亂真學術人心幾於渙矣渙之象曰格廟撫周  
原之故地崇闢學之大防以翼以嚴俾流蕩忘返者聞風  
而自止使君知所先務繇此納之軌物卽漸復西都之人  
文非難也公名鼎望字冠玉號澹齋順天豐潤人順治十



六年進士以高策擢庶常踐刑曹出爲新安廣信太守康熙二十三年補扶風郡是用勒石肅告來哲併綴迎送神辭三章屬所建義學童子歲時肄之侑享廟中其辭曰

迎神

羲始畫文爲豕闢鴻蒙何燦燦天水左卷阿畔關之疆竝可按燼彼秦微於漢誰揚之獲壯觀清河公啟西幹太白陰橫水岸濂與洛匯清瀾起同時相導贊粵紫陽遺言半舉其輝旦復旦誕有鄉神不散閔求者增煩惋爲公歌歌且歎怙垂靈無我難



降神

公出自南浩流洋洋白雲被野蘭芷爲梁文鯉來駟赤虬  
上襄騰吳挾華乃矚其疆我車脂牽旌旆孔揚瞻彼嘉液  
綏紛於堂公儼在上愾乎如旁心之震懔駿奔靡康牲皆  
握角粢盛用香惟桂之酒若椒以漿庶公安留舒坐肆芳  
高言東序聿著西庠士曰公廟公曰我鄉溫何穆穆逮茲  
八荒公嘉虞此激申集觴沛施神怙昭我周行

送神

公驂兩螭何蜿蜒雨裔裔來雲娟娟擊鼓東軒雷以淵盈



階佩服相鮮妍蓀芳藻麗爭持前墜落滋華如榮泉取飲  
公馬聲喧闐蛟鼉盤迴卧正堅滌觴重起同攀牽公愛我  
人爲留連展詩童冠鄉少年樂樂其所生之天徘徊桑梓  
胞與然公知我知覺我先抗聲清歌差比肩充列灑掃皆  
能賢澄暉晄晄方高懸偃蹇靈輿都且駢列陳以豆或嘉  
籩膏聞藪沸吹紫烟南山有哲翠微巔風捲怒虹垂大川  
霧豹長驅離哉翩黃昏昂首叫四筵如澠之酒殺如岼願  
復進公公舍旃公未醉飽馳何遄水波其興鳴潺湲公無  
困我還言旋留公不得泣涕連我饁我耕絃我絃珠琴石



鼓爲昭宣

康熙二十五年七月

創修準提庵記

國朝孝廉

尹贊甲

邑人

釋氏書汪洋浩渺似列子而虛寂過甚儒者弗道也然其  
離相歸宗明心證果直使天竺三乘與杏壇心傳函關玉  
軸並列三教垂萬世且不朽焉是故光之現也在周像之  
來也在漢迨五葉同莖而教之大行也又在蕭梁不獨省  
會郡縣梵宇連雲浮圖接日卽窮鄉僻壤罔不建叢林奉  
道場而皈依之歷唐宋元明迄今千餘年如一日也西京  
爲周家舊邦文武接踵周召比肩衣冠文物之彪炳辟雍



鼓鐘之丕振遠軼鄭衛而四境內古刹之載郡乘者不啻  
星布碁列獨佛母準提之庵徧府治中外未之有也僧元  
來姓史諱俊籍浙江精李蓋世家子弟也弱冠負才名梓  
里縉紳咸器之三考竣授岐陽典史洎官十有三年清慎  
自持口碑載道嗣謝事東歸厭塵囂牽纏披剃沙門蓋欲  
從蒲團上尋本來面目方之陶朱留侯浮五湖戲滄洲一  
班胸襟非徒托鉢募緣了此餘生而已也癸丑秋酬峩山  
舊願杖策西來道經敝邑邑之童叟喜其來惟恐其又去  
相與垂涕挽留而郡守楊公邑侯武公兼爲投轄遂卜基



於儒林巷中出私篋數百金剏修準提菩薩庵一座正殿  
五楹中塑準提像絢彩莊嚴傍列觀音地藏二大士層樓  
曲檻備極工巧殿之前左右廊房各三楹凡四方冠劍豪  
遊者數假榻焉廊之前構一圓門門之外東西僧舍如廊  
房數中則接引殿西則三元宮前修關聖帝君殿背塑韋  
陀尊者持杵拱向作頂禮狀越十年而落成規模宏敞殿  
宇巍峩準提名勝與金佛普覺並爲郡中大觀而上人亦  
借此曇院長春作卓錫久計奈今年古稀有四筋力倦勤  
情懷首邱紳士耆舊忝夙契者僉云上人有如此大功旬



餘戒途與我輩永別弗立之石以傳久遠是沒人之善也  
余曰上人脫功名富貴如敝屣逃乎名也逃名而復立石  
以表其名恐非上人意但杠梁道路有能興廢舉衰出數  
緡作功德者尚豎碣以刻姓氏況心施財施兩全如上人  
者乎遂悉其始末而壽之瑱珉是爲記

康熙二十五年四月

喜雨感應碑

國朝進士朱繡邑人

泰山之雲不崇朝而遍天下太白亦然太白於位爲金於  
水爲母爲關西鉅鎮其雲行雨施使民飲和食德習而安  
焉忘帝力於何有自宋蘓文忠公來佐是郡以雨名亭以



亭誌喜秦人於是歲輒以雨爲喜矣又明太守沈公步禱  
太白輪未廻而雨沾足秦人於是旱輒禱太白矣南太白  
在郢其爲山也高峻摩天絕頂爲玉帝閣靈湫有四北太  
白在鳳其爲山也小而殿宇湫池一如南山狀甲子夏旱  
魃爲虐流金鑠石我二千石曹公甫下車以公務入青門  
韓公曰是余之責也夫遂焚香齋戒肅誠告天三日而雨  
降旣而亢暘如故連月不雨民擊鼓鳴鉦哀號顓請曹公  
立壇城之西率寮屬晨夕步禱引咎自責公則復立壇於  
橋頭村不蓋不乘禱無寧曰復與民約給汝糧求雨於南



山余詣北山而親禱焉七月之朔步自東門見民襁負逃散皇皇然乞食於四方者公涕淚止之是夕宿山之半詰朝素服芒屨曲徑崎嶇攀緣而上與鄉之士大夫及兆庶匍匐請命哀號之聲響動林谷其時泉已涸而忽湧卉無花而飛香民皆曰神應矣公之誠驗矣而乃擎水至橋頭曹公已恭迎於路不三日而一郡大雨不五日而雨遍關西更可異者凡公禱雨經過之所如橋頭村前後聯絡諸處而雨尤甚一似其雨若爲我公私者實不可得而解也嗟夫無是雨不特無今歲之秋種抑且絕來年之夏麥其



於民生豈細故哉維天眷德維德動天天地有化育而至  
誠能叅贊之陰陽有休咎而在位能燮理之理固有然昭  
昭如也其或德涼不能感召遂謂視天夢夢以自文其過  
者亦昧於理矣我公治郡五載於茲嚴明正直勇於爲義  
如被困保寧卒能調劑軍需飽騰士馬及折獄會府片言  
之下庭訟翕然長安父老早已豐碑誦德載在貞珉公名  
北城號溥菴戊子歲進士東魯滋陽縣人

康熙二十三年十一月

重修文昌祠記

國朝郡守王

俊

三韓人

天人之理合則同歸於一致分則益見其多岐稽古證今



有必然者非臆測也事之由創而成由廢而興天未嘗故  
遜其功而物之由新而故由久而廢天亦何爲而獨任其  
咎自任事之人不概見舉凡事物之廢興成毀悉諉之天  
於是人力斲而天心厭將見故者愈多廢者愈不起良可  
歎已岐陽城內東隅立先師文廟廟之左有文昌祠前之  
人所以祀文昌者以神能翊文運振文風也然斯祠一鼎  
建於萬歷之庚寅一重葺於崇正之丙子非天特出其神  
功鬼斧雨粟雨金而幻爲瑰異及鞠爲茂草荒作鳥鼠之  
穴又非天有疾風迅雷摧殘剝蝕以致此是皆人爲之耳



可諉之天哉吾僚友溥庵韓君宏毅性成篤信氣稟初佐  
是邦能於金戈鐵馬之間烏道羊腸之下造糧艘濟士馬  
如運諸掌逮王道蕩平久輔郡政兩攝郡篆百廢具興於  
城隍文昌之廟尤加意焉丁卯秋余膺簡命來守岐陽樂  
君之先與有成也肅衣冠拜文昌祠閣吾見其高以宏堂  
吾見其輪以奐奎樓吾見其峻以竦鐘樓吾見其堅以壯左  
右翼吾見其深以密道室吾見其輝以敞坊吾見其美以  
章城門之聚星吾見其偉以備以及庖廚囿囿靡不具焉  
牆垣欄楯靡不麗焉金碧丹雘靡不至焉雖閣仍舊貫要



之一閣之外莫非匠心所獨運矣他如購材木董工匠給價值餽廩警惰勞動無一不曲盡心力而或者曰郡民素罹兵燹財力已殫得毋勞吾民乎非然也君捐俸以創之十之七衆捐貲以輸之十之三是以民若不知而成亦不日嗟乎不貪天之功以爲己功君子讓善之辭也天定勝人人定亦能勝天志士爲山之義也何使前乎君者不以廢興成毀諉之天則爲之力者不專在君矣惜也君小試之耳使君一旦當大事成大業見義必爲賈勇直往於舉世不爲之時不牽世俗趨舍其有裨於社稷人民者可朝



夕而就視夫唯唯諾諾歛衣退避之夫豈止什伯千萬哉  
後之謁斯祠者夫亦可以立頑而起懦矣君諱北城號溥

庵東魯人

康熙二十八年二月

### 創修奎星樓記

國朝郡倅韓北城

東魯人

文昌帝君主文衡神也岐陽自兵燹以後祠宇摧殘而人文亦稍懈弛衰微矣余捐修城隍廟落成旋有整修文昌祠之議議者僉曰非予不可余以文衡所在不敢謝不敏乃咨縣尹輸役乃命兩學博勸募乃命郡首領縣尉省理日省惟三而議者復曰壞一椽則易一椽缺一甃瓦則添



一甃瓦可乎余曰否否今之議修所以培文運安神明光  
祀典也不壯麗輝煌則不能啓人文秀傑之氣以發其光  
華是以於閣則增新之於殿則擴充之於門則高聳而寬  
大之丹雘塗墍亦足以示巍峩而美輪奐矣獨是奎星之  
像側立閣之東隅心弗慊焉議遷之西議遷之城移日未  
有決說者曰宜卜樓於祠之東南余輟然喜但計功力則  
倍費若之何幸得同志者八人明經張星彭鼎新孝廉尹  
贊甲楊時建太學王舉安庠庠袁轅程義瑞都司王永正  
競相捐助而又得朱進士繡施之木貢生袁有駿生員鄭



直施之石以至紳衿汪弘量程代侯度憲施之粟盧傳世  
維友善施之銀舉凡捐錙銖者率以錄饁半餉者無不庸  
遂克底於有成不日之間文星高顯光映斗垣猗歟觀止  
哉余因而維之曰文星高顯培風氣也而不篤學懋德以  
應星文其可乎夫梓潼帝君一十七世爲士大夫身未嘗  
虐民酷吏廣行陰騭上格蒼穹迄今誦其訓辭曰勿謀人  
財產勿淫人妻女勿因私讎使人兄弟不和勿因小利使  
人父子不睦大約不離孝友者近是詩所云張仲孝友其  
人者是耶非耶總之黃流不盛於瓦缶大福不降於淫人



則士之發憤爲雄陰行善事又曷可少耶是知文脈雖培  
得文章而文運乃開文運雖開得陰陽而功名益大凡百  
多士勿以涼德而厚望於神則幾矣而余又不無遠慮焉  
典禮百代不改山河歷世變遷後之視今亦猶今之視昔  
觀斯樓也庶幾曰有其舉之莫或廢也則余所願也已  
康熙

二十六年七月

重修試院記

國朝郡守任晟三楚人

國家校士之地廢墜者當舉傾圯者當修其責任在有司  
其經費歸庫帑非若禪林道觀可募衆以集事者也我



上御極以來軫念民瘼利無不舉如屯田水利墾荒開渠  
築海塘建城郭凡可以衛民而捍患者費皆不惜億萬計  
一切官府廨舍之建置莫不動支錢糧不令吏有毫髮捐  
而況於朝廷造就人才之所其費無幾肯令所在紳士出  
貲經營者哉茲鳳翔試院多年不修以致土壤墳積外高  
而中低宿雨停潦既侵蝕其址而其上更有滲漏之患學  
使者至胥役輒徵里民修葺費不過飾粉堊糊紙於壁外  
若可觀而內實朽敗將見棟折榱崩日就傾圯矣雖欲因  
循有所不可余旣來守是郡禁止派累不以課士者擾民



則此試院之營建自當上請動正項以興厥役然頻年來西陲繁費不貲凡爲臣子不能建一策出一力早奏底定顧茲工役尚敢煩天家費亦蟻忱所不能安者也雖朝廷並不惜此但一經申請反覆料估必需歲時而學使按臨不日戾止則主試衡文生童就試皆覆壓是懼勢安可待乎遂於去冬議捐已貲惟力不從心恐不能畢功而郡中紳士劉司馬白唐楊春元崑孟春元聯鼎等聞余之志咸願共成之計八屬寶邑所捐幾與郡城埒餘亦無不樂輸者於是共推明練士廿餘人以董其役鳩工庀材盡易而



新之適余督餉秦州及返郡見曩之圻者整崩者完朽敗而漫漶者咸釐飭而巍然煥然且規模視前加廓屋宇視前加多雖舊址之是因而實無異於鼎建焉及考其工費則余所捐猶不及十之一槩皆出於此都人士之輸將者憶當議捐時不過觸日時艱且恐申請上下動淹旬月爲一時之權宜未必有當於大義而闔郡紳士之踴躍樂從若視爲一己之私事而爭先恐後不逾時卽告竣仰見上之德澤汪濊有以深入乎人心故往往激發於義如此而此都人士之趨事赴公其有功於國家者尤不可沒也爰



紀其姓名勒諸碑版以垂於後俾觀者咸知爲一時盛事

云

雍正十年五月

創修鳳鳴書院記

國朝學憲

嵩

壽

白山人

鳳鳴書院者郡守羅公之所建也公諱經爲西川知名士由甲辰進士選授部曹繼而握篆茲土視事以來廢修墜舉庶政釐然余兩次按試見所屬文思拔新領異不墮輟飭陳腐惡習心甚喜之因叩鼓舞振興之由生童咸嘖嘖頌功於羅公書院焉伏思我皇上加意作人於國學鄉學專官教導外各省設立書院歲捐帑金用資膏火固已賢



才鵲起哲士蟬聯矣而一府一縣中或有緣道里間隔家  
務羈縛不能負笈會城者則羅公書院之建信有深心也  
試事告竣余親詣其地坐落郡公廨之左一望幽靜絕遠  
塵囂臨街蓋造牌樓大門氣象宏敞內分東西兩院曲折  
而實爽塏講堂廂房以及齋舍一一布置得宜秉鐸者則  
奉先屈主政也欲訓士而先延明師羅公可謂得要領矣  
余於肄業諸生竊有厚望焉自昔書院之立非徒咕嗶以  
揆詞摘藻竟乃事也考亭白鹿江右濂溪代出偉人迄今  
考其分年治事之規課習講論之條未嘗不奮然興起也



韓昌黎進學解有云業精於勤荒於嬉行成於思毀於隨  
賢太守案牘之暇殷殷然舉諸生陶冶而矩矱之則太守  
之所以屬意於諸生者大而諸生之所以自爲期許者詎  
可小哉文周之治術奕禩猶存橫渠之儒宗千年不替果  
其攻苦下帷力行身體竚看一鳴驚人異日皆可爲國家  
之瑞鳳也則鳳鳴書院之名不爲泛語矣是爲記

乾隆四  
年十月

重修文廟記

國朝藩憲

帥念祖  
江西人

由三代而上政教出於一而學重於天下由三代而下政  
教出於二而學爲空名古者井田與學校並建而黨庠術



序國學之法達於天下朝廷郊廟事神治民朝覲聘問鄉射食饗合衆興事之政莫不一出於學由之以教其孝慈友悌仁義忠信之民使相告語而誘勸其愚惰士民之生其間者不緣於南畝則從事於禮樂不在其家則在於學之中上之人精神既專一而不紛下之人亦樂而趨之不知其倦於以遷善遠罪而成俗也此所謂政教出於一而學重於天下三代已衰遭秦變古井田壞而先王之學亦廢數千百年來雖有欲治之主宗儒術講文學深詔執事祈進民心亦多附以己意非倣先王之法而有復古之志



也內而六職百官外而郡守邑宰其朝夕從事則惟簿書  
獄訟兵食之爲急曰此爲政也所以治民其於先王養士  
之法大抵相安於苟簡弦歌洗爵降登揖讓之容拜俛伏  
興之節則時出而一用之孔子之廟曰此爲教也所以導  
民縉紳先生學士大夫從事於其間旣未遂曉習其義若  
夫里閭田畝之民蓋有老死而未嘗得接於耳目者况於  
服習而安之者乎此所謂政教出於二而學爲空名我  
朝開基定鼎以來歷聖重明距今蓋百年矣昔周之德盛  
於文武而雅頌之作蓋在成王之世方今興起學校長育



人材文教之盛登三咸五以時考之固其所也余忝任旬  
宣七載於茲凡田疇之興廢學校之盛衰夙興以求夜寐  
以思何行而可以章主上之洪休以上酌知遇下達民瞻  
區田蠶政具有成書刊布各屬期於富而後教而通判鳳  
翔郡事張君文祐爲能實力奉行著有成效今年又請捐  
金重修文廟經始於仲春落成於八月旣望凡正殿兩廡  
門堂學舍棟楹梁桷板檻之腐黑摧折者則易之葢瓦級  
甃之破缺者則補之赤白之漫漶不鮮者則飾之棖題高  
敞戶牖明通丹刻輦飛輪奐離立嗚呼張君之於政可謂



知務本矣當郡學之壞不治也爲守若令者春秋帥所屬  
釋奠於其堂當亦一動其心思所改作然而因循怠忽宜  
修而不修迄於今也士之議者得毋謂學者有司以爲末  
務而非守土治民之所急乎及今學之修也惟其倖之能  
自慷慨不借助於同官不徵材於士庶越日踰時而功告  
竣則夫以有司視學爲末務者其信然也歟鳳郡古右扶  
風地也橫水靈山東環西拱汧渭潏帶於前終南吳嶽在  
其境內居民厚重質直勤稼穡務本業士習於儒雅敦禮  
教絕浮靡地靈則材美而易成俗慤則愼刑而易治夫美



茂易成之材而生於醇一易治之俗佐政者又以慕學發  
憤之心而新其宮室教肄之所四書六籍聖賢之言皆在  
事物名數禮樂之法具存使其相與學而明之不徒以章  
句文字爲事不敢以干世取祿爲懷則人人有以自學其  
性而大道之行三代之英非遠入也何必遠追隆古哉夫  
因後世之法而不失乎先王之意者此有道者之所能也  
張君之自致與所以厚期其士民者或者其幾於此矣來  
請曰願有記故記之

乾隆八年九月

### 重修郡城隍廟記

國朝孝廉 劉錫範 邑人



或問廟宇創建與重修孰難余曰創建易重修難其易奈何蓋開國之初凡應祀神祠必奉明旨動國帑督工者有官奔走者有役一呼百應唾手成功此其所以易也至重修之舉雖有基足憑有勢可乘而朽蠹破碎悉不堪用物料人工種種須費集貲董役處處須人非有慷慨任事者不能經始非有急公趨事者不能襄成此其所以難也鳳郡城隍廟其來遠矣始創之年月無考自明迄今修葺者蓋不知凡幾要不過補苴罅隙已耳從未有大興工役式廓規模如今日者也今何以能致此適遇郡伯孟公別駕



章公慨然振作各捐已俸倡於前以故在城在關並各鎮士庶及外省客商俱能好義樂施助之於後是以錢糧足用而工程易舉也然使經理不得其人亦難以允觀厥成而又得督工會首太學生李楫唐崇堯等盡心勞力殷勤罔懈視公事如已事不數月而底於成今茲廟內大堂二堂三堂寢宮東西兩廡並速司各殿俱金碧輝煌煥然維新左右鐘鼓樓二門遠門內外牌樓大樂樓以及道房齋堂施茶湯房亦屹然完固燦然改觀且於廟西南隅添創戲樓一座會內公貲所出也東南隅添創戲樓一座邑人



李際榮獨力所捐也是役也省歷年之冗費垂久大之鴻  
規興工於辛未孟夏告成於壬申季秋用力可謂齊矣經  
營亦云瘁矣是不可以不記爰鐫姓名於貞珉以誌不朽

云

乾隆十七  
年九月

唐知府傳

節訂

明進士

袁楷

邑人

嗚呼歲寒知松栢國亂有忠臣豈不信乎哉崇正癸未冬  
陝西之變諸死義者按察使黃綱長安縣吳從義慶陽道  
段復興甘肅都御史林銘幾總兵馬燠鳳翔知府唐時明  
當李自成入西安也在官在籍有崩角拜賊者焉有操戈



同逆者焉微諸君子仗義伸眉維持於其間人紀絕人類  
蔑矣唐公之死余所親見者不可以不傳公字爾極號蹇  
夫河南固始人萬歷戊午河南鄉薦第一辛未署長垣縣  
教諭諸生執經課藝者皆訓以道義不以帖括先德行修  
先師杏壇古跡贖仲由塚傍侵地蓋已慨然有結纓同歸  
之志矣歷官國子監學正禮部司務南京戶部主事擢鳳  
翔知府時流賊屯河以南關中少甦公獨憂之旣視事有  
可遂行者不俟上請輒舉革而尤以固人心繕城隍廣儲  
蓄爲急務壬午冬入覲次年歸余館於公間詢時政公屏



人扼腕曰事不可爲矣朝廷不核實而徇名主爵者善鬻官不善掄才本兵以將帥爲外府怯懦者冒功僨勦者匿罪兵日益賊日多而不知兵之爲賊嚆矢也是救關借戟也餉日增將日驕而不知餉之爲將于橐也是救火沃膏也嫠猶恤緯諸臣不恤國而惟便是營根本旣撥郡邑守令何能爲淪胥以亡行見之矣是年秋鸚鵡大至栖城內樹者尾相接翼相比也占者曰野鳥入室主人將去公聞之曰太守守土之官主人非予而何爲我爲鸚鵡言毋饒舌太守有死弗去也時總督孫傳庭治兵西安軍聲甚張



賊憚之不西向兵部曰檄書趣進兵傳庭不得已進兵汝  
郊之間戰大敗死亂軍中諸將西奔賊晝夜追之至潼關  
關門不閉遂至西安公集士民爲守城計而諸敗兵至城  
下者呼城上人恐以賊勢皆洶懼無人色十月賊至余從  
公守南城余問公曰事將奈何公曰余死復何言獨老妻  
幼子在此顧在君耳余諾之城將陷公家人隨余出南門  
將走斜谷由漢蜀至江南旣出城殘兵塞路不可前生員  
吳國材以公孥匿西山免焉典史董尚實降賊無禮於公  
公叱曰吾不以軍法斬汝將取汝地下耳牛金星者寶豐



舉人也以橫暴被褫從賊掌書記使董尚質擁公來見公  
罵曰汝以士類從逆安得餘汙汙我我死暮矣惟不見官  
兵磔汝爲恨金星怒復喜笑曰公吾鄉解元久慕公母自  
苦逼之東行以十餘賊衛之公引決不得至興平夜半守  
者懈公書二紙付家僮投七首於地曰日吾怒罵金星謂  
不足辱吾七首吾欲刺之李自成耳男子事旣不就尚忍  
與賊共戴天耶遂以手扼吭而死十二月初七日也家人  
以公棺殯於鳳翔東關士民過者皆流涕公死之日董尚  
實在鳳翔忽發狂呼服若謝罪狀口目皆血踣地死明



三月京城失守嗚呼公可謂不食其言矣或曰公不與城偕亡等死耳至興平而后死何居未是亮公心者曩使公一聞賊卽雉經署中人謂公實怖賊計無復之爲匹夫匹婦諒耳旣見賊賊重公不肯刃公顧昂首大罵抒胸中憤恨卒不受污抑何壯也等死耳死何論兩地哉昔張巡糜軀睢陽許遠至雒乃受命誰復軒輊兩公者夫使君亦猶此志也公冢嗣紹先汝南佳士世其家學匍匐至鳳翔侍母扶父櫬歸葬鄉人義之祀鄉賢祠順治十七年復至鳳翔余授以傳今太守項公議祀名宦



王孝廉傳

明進士 袁楷 邑人

孝廉王鼎安字磐石孝廉伊蒿之子也始余與伊蒿爲舉業文字友聞其室人有胎教矣見其懸弧矣見其能言匍匐矣見其舞象矣能讀書爲文矣經史制義之外無他嗜好矣見其爲文學於庠矣聽鹿鳴於國矣見其感憤疾病矣死矣年二十七耳踰年見其墓有宿草焉今見其白楊堪作柱矣至是爲之傳孝廉以朴茂之資爲淵博之學內行醇備外儀修謹人莫不愛而重之崇正十五年歲壬午八月旣望伊蒿以闡中七義見示余斷之曰捷已而果然



明年癸未伊蒿父子俱上公車是歲八月放榜不得志伊  
蒿以久躋名場將就仕安私謂父曰自吾父子來京師親  
見大小臣工不多壘是恤而寵賂滋益章一似天奪之鑒  
者禍將不遠亟去猶恐其及大人可褰裳就之乎伊蒿曰  
汝言是卽日歸九月抵家五日而潼關喪師之問至鳳翔  
十月十一日逆賊李自成陷西安府十一月賊盡據陝西  
毒掠縉紳自一命以上皆不免伊蒿父子以不仕獲免於  
難聞有汚僞署者鼎安頓足大哭痛憤不食遂疾作崇正  
十七年正月朔逆賊僭號自蒲坂濟陷太原雲中將犯京



師鼎安疾甚謂其尊人曰兒不復養左右矣其父驚曰何謂也曰兒自邁禍以來不復作春明之夢疇昔之夜夢至京師是魂魄將與國家永終矣繼曰吾父子受國恩無以報今賊勢至此必復迫脅以官兒死則父亦得解庶不污賊手也顧吾親老矣兒不復養左右哽咽不言者久之家人莫不泣踰月聞京師不守驚曰皇上南遷乎遂一慟長號而絕乃知見夢之夜爲都城破亡之日也安可謂不降其志不辱其身而無負科名著矣况其精誠所結惟君父之是念哉國有臣家有子其與倫紀永存以不朽也元配



程氏故繁峙知縣程雲翰女當孝廉卒三日氏引決相從者至再家人救免誓不復生媼戚解勸皆不聽其姑泣曰媳婦從吾兒地下甚善吾豈奪汝志然媳婦在室猶兒在側也今又舍我去將若之何獨不念汝夫之囑汝者乎語未竟氏收淚謝曰敢不從姑之命是後或避兵或避賊蹟尾倉皇婦姑未嘗斯須離媼戚及舅姑皆稱曰孝婦伊蒿命幼子立子爲兄鼎安嗣是爲傳

貞女傳

訂正

國朝庠生張守中

邑人

鳳城西南十五里六塚村有孤塚聳然而高出郡邑志皆



載六塚余竊心疑之塚以六記何歸然者僅此也他日以  
事過村向二三父老詢及塚故僉曰吾爲童子時祖父行  
嘗述及此曰此非六塚乃貞女塚也貞女不知何時人並  
逸其姓氏幼與孀母居嘗許配同邑某未及嫁塚外遊不  
歸母亦物故女誓志不再字飲冰茹蘖者四十餘年一日  
忽有戎弁擁騎從甚盛來村訪女女細詢其本末則塚也  
相對悲泣塚見女白頭猶笄家徒壁立且感且慚揖而謝  
之女曰妾以君爲泉下人久矣今邀天之眷得復見君妾  
又何求君稍坐戶外妾爲摒擋茶湯以勞士卒塚候久不



出入室覘之已投繯死矣壻哀慟備棺成禮及葬率卒伍以衣襟盛土而成塚焉時女年已六十餘因名其墓曰六十女塚俗呼爲六塚者因省字而譌也余聞其言悲女之事竊歎天之愛人也亦猶夫愛物天於松柏其愛之者也然必朔風摧之霜雪凌之而後松柏之後凋見今女之節非所謂亭亭於歲寒者乎胡人知松柏而不知女也夫人之不知猶可言也至若志以旌善亦於女而遺之何哉原其故郡邑志書皆成於兵燹煨燼之餘且以倉猝事不暇詳考遂相沿以六塚書之嗟乎天地間孤芳特立嘗無



人焉過而識之卽識矣而或不以傳傳矣而或力不能表揚以故埋沒於荒烟蔓草間而不得與松栢同一表著者固已多也豈獨貞女哉余因書其事以俟夫採風者

與岐州刺史鄭孝穆書

北魏

宇文泰

知卿蒞職近畿留心治術凋弊之俗禮教興行厭亂之民襁負而至昔郭伋政成并部賈琮譽重冀方以古方今彼有慙德

上孟制臺書

畧節

明進士

袁楷

邑人

楷受老公祖慈庇九年於茲矣當代異時移之秋有二天



萬厦之恃楷何幸而獲此也楷有至情敢披瀝於臺座之前楷昔請告在崇正十一年時年四十有四非有官謗之懼也非有規避之私也循資陞級亦可望至臚仕而楷念先君止楷一子杳無孕嗣遂援古人獨子歸養之義堅意乞休頗費曲折乃遂所請無何闖賊禍起竊據關中楷無昔人見幾之明閉門待禍爲賊執縛拷掠之下自分必死使大兵遲一月入關楷身膏原野矣乃得以餘生受翼庇以有今日楷又不自意何以有此也歲前府縣持部文見示始知老公祖爲舊紳上疏請優禮蒙旨俞允此又前代



革除之際所不能邀之盛典史冊書之寧獨舊紳感戢而  
已又聞令督撫按舉薦前代舊臣府縣以楷爲老公祖式  
廬之人將以楷名濫此大典大懼無地楷孱弱多病今日  
筋力何如昔時不能作官於二十五年之前能宣力於二  
十五年之後哉去冬左臂左股麻木不仁種種老病殆將  
不支是以咫尺慈顏不能躬覲又性懶慵殊甚常半歲不  
出門出則跨蹇驢猶令一僕控御恐其墜蹶往往爲行道  
竊笑此豈可遠役四方者耶萬一弓旌下及出於意外爾  
時將堅卧不起耶則有違命之誅且與疾往乎則有僨事



之矣進退皆死罪也雖老公祖亦必不能救之矣先君且  
憾於地下曰吾所厚相知在此而不能庇吾一子吾何所  
望焉老公祖能安於心耶楷竊念知先君者無如老公祖  
則愛楷亦無如老公祖楷萬萬不必有此慮而楷娓娓瀆  
聽者誠恐道府不垂亮又撫按亦必通報然總以老公祖  
爲定楷不向老公祖陳情而誰陳乎但得物色不及罪辜  
不加教養子孫苟延病體常爲逸民使先君蒸嘗不墜於  
地是卽老公祖所以報知己而庇其後人者也傳之無窮  
爲萬世美談區區啣結復何足言



到任謝執政啓

宋郡倅 蘓

軾

眉山

軾本凡材謬承選取忽從州縣便與賓佐捫躬自省豈不  
愧幸伏惟昭文相公素所獎庇曲加蒐揚旣蒙最深之知  
遂有自重之意所任簽判一職兼掌五曹文書內有衙司  
最爲要事編木筏竹東下河渭飛芻輓粟西赴邊陲大河  
有每歲之防販務有不蠲之課破蕩民業忽如春冰於今  
雖有優輕獎酬之名其實不及所費百分之一救之無術  
坐以自慚唯有署置之必均姑使服勞而無怨過此以往  
未知所裁



寄同志諸友丈

明孝廉張舜典邑人

此學問是性命一大事古今一大事人生一大事除此則  
無理可談無事可行矣雖平易而實精微雖淺近而實神  
妙雖有爲有思而實無聲無臭未嘗不貴介節而介節猶  
其粗未嘗不貴事功而事功猶其末未嘗不貴文辭而文  
辭猶其跡須要如舜之由仁義行非行仁義須要如文王  
之不識不知順帝之則須要如孔子之從心所欲而不踰  
矩少帶知見少著情識少有做作卽屬滲漏何以爲率性  
之道故必高高山頂立深深海底行然後爲至也若參禪



靜坐而可以爲道則馬祖百丈輩卽可以紹孔孟若飾行  
廉潔而可以爲道則黃憲范丹輩卽可以續洙泗有不待  
濂洛諸儒始爲之研窮也此事自有真命脈真消息真宗  
旨惟在人之自悟自修自證何如耳僕雖淺陋粗畧未造  
其極然每每隨事隨念思之則知其必如是也望諸公深  
造自得齋戒以神明其德以致美大聖神之域毋徒爲鄉  
黨自好之士豪傑之士雖無文王猶興諸公獨不可爲豪  
傑乎何時相聚得講一番更快也如肯遊嵩少當懸榻以  
待之迂言蔓蕪希相諒於楮墨之外



答劉芹野

張舜典

抑之詩有云有覺德行今人惟知德行已耳而有覺之言殊不尋思此中大有旨意會得此則明明德之學不煩訓詁講究而自了然於目前矣不知尊意以爲何如

答靈臺楊心吾

張舜典

聖學切要肯綮之處無過知微慎獨其中精義有不容言要在深信深造方得其妙非區區俗儒口耳之談惜我輩年長又不能常相聚會研窮此義虛過時光殊爲耿耿

三良論

唐興元尹

李德裕



秦穆之殺三良詩人刺之矣春秋譏之矣今不復議惟三良許之以死而前代無議何也且臣道莫顯於咎繇孝友莫盛於周公咎繇尚不殉於舜禹二后周公尚不殉於文武二王三良詎可許之死乎如三良者所謂殉榮樂也非所謂殉仁義也可與梁邱據安陵君同譏矣焉得謂之百夫特哉昔荀息許晉獻言繼之以死君子尤歎斯言之珥不可爲也况得以生同榮樂死共埃塵以爲忠乎晏平仲言君爲社稷死則死之斯言得之矣自周漢迄於巨唐殺身成仁代有髦傑莫不顯一身之義烈未有繫一國之存



亡唯紀信乘黃屋以誑楚赴丹焰而存漢數千年間一人而已漢祚四百由此而興余謂漢祖封建紀氏宜在蕭曹之上報德未稱良可悲也

死在亭說

東湖蘓公祠前

國朝郡守

朱偉業

泰興人

伊人死在秦詩也秋水方盛風人覩物生情思賢人君子欲得而見之也鳳翔故秦地城外有水曰東湖爲昔蘓長公遊觀所淼淼一鑑古木蒼然暗通清泉遠收翠巘洵幽境也郡誌載湖中舊有君子死在兩亭想亦前之官此邦者因地興懷得風人遺意動蒹葭阻長之慕而顏其亭耶



甲戌之夏予來守是郡偶至湖上但見荒烟蔓草祠宇傾頽尋問二亭僉曰皆廢矣而湖之北岸尚存臨水小軒或又曰此卽死在亭是年七月因捐貲鳩工芟柞荒蕪修補破敗并鐫是額於此以識舊觀以達前人之意云爾

乾隆十九年

雨華亭說

行臺東偏卽舊察院東

國朝邑令李

莊

北直隸人

癸未春偶欲於斯構一園亭率工師相度指畫之見細木林林然詢之主守者曰桃也因有觸於桃李園開筵坐花之句旣作亭功半會時雨優霑四民稱慶與長公判扶所謂雨麥於岐陽者有合焉而灼灼之華適當其會乃兼取



二賢之意以名是亭以見今茲之舉聊以學步前人而未

嘗有所創也

乾隆二十八年

### 石鼓文跋

宋歐陽修 廬陵人

岐陽石鼓初不見稱於前世至唐人始盛稱之韋應物以爲周文王之鼓至宣王刻詩韓退之直以爲宣王之鼓在今鳳翔孔子廟中鼓有十先時散棄於野鄭餘慶置於廟而亡其一皇祐四年向傳師求於民間得之乃足其文可見者四百六十五不可識者過半予所集錄文之古者莫先於此然其可疑者三四今世所有漢桓靈時碑往往尚



在距今未及千年大書深刻而磨滅者十猶八九此鼓按  
太史公年表自宣王共和元年至今嘉祐八年實千有九  
百一十四年鼓文細而刻淺理豈得存此其可疑者一也  
其字古而有法其言雅頌同文而詩書所傳之外三代文  
章真蹟在者惟此而已然自漢以來博古好奇之士皆畧  
而不道此其可疑者二也隋時藏書最多其志所錄秦始  
皇刻石婆羅門外國書皆有而獨無石鼓遺近錄遠不宜  
如此此其可疑者三也前世傳記所載古遠奇怪之事類  
多虛誕而難信况傳記不載不知韋韓二君何據而知爲



文宣之鼓也隋唐古今書籍粗備豈當時猶有所見而今  
不見之耶然退之好古不妄者予姑取以爲信耳至於字  
畫亦非史籀不能作也嘉祐八年六月十日書

詛楚文跋

歐陽修

右秦祀巫咸文今俗謂之詛楚文其言首述秦穆公與楚  
成王事遂及楚王熊相之罪按司馬遷史記世家自成王  
以後王名有熊良夫熊適熊槐元而無熊相據文言穆公  
與成王盟好而後云倍十八世之詛盟今以世家考之自  
成王十八世爲頃襄王而頃襄王名橫不名相又以秦本



紀與世家參較自楚平王娶婦與楚昭王時吳伐楚而秦  
救之其後歷楚惠簡聲悼肅五王皆寂相接而宣王楚良  
夫時秦始侵楚至懷王熊槐襄王熊橫當秦惠文王及昭  
襄王時秦楚屢相攻伐則此文所載非懷王則頃襄王也  
而名皆不同又以十八世數之當是頃襄王然襄之名理  
不宜謬史記或失之耳疑相傳寫爲橫也

石鼓文辨

宋董道

世傳岐山周篆昔謂獵碣以形製考之鼓也三代之制文  
德書於彝鼎武事刻於鉦鼓征伐之勲表於兵鉞其制度



可考後世不知先王之典禮猶有存者鑿山刻石自是昭  
一時功績唐世諸儒以石鼓無所据至謂田獵之碣蓋未  
知古自有制也歐陽永叔疑此書不見於古唐乃得於韓  
愈韋應物以其文爲雅頌亦恨不得在六經推大著說使  
學者肄業及之其驚潛動蟄金繩鐵索特以其書畫傳耳  
顧未暇掎摭其文列之部類中後世得考詳方唐之時其  
文隱顯未盡缺落徵詞索事或可得之而愈應物徒知校  
獵宣暢威靈懣警彝夏故愈謂此爲宣王時應物以其本  
出岐周故爲文王鼓當時文亦不辨故論各異出也嘗考



之於書曰獵雖歲行之至於天子大蒐徵會諸侯施大命  
令則非常事也故四王二公後世以爲絕與然則宣王蒐  
於岐山不得無所書或史失之其在諸侯國當各有記矣  
不應遂使後世無傳此其可疑也當漢之時見號奇字如  
甄豐輩定作史籀書竇蒙以爲宣王獵碣而曰我車旣攻  
我馬旣同張懷瓘以此本車攻詩因考合前說且曰諷畋  
獵之所作也愈應物其書藉藉則有據矣然爲諷爲美其  
知不得全於文義見也傳曰成有岐陽之蒐杜預謂還歸  
自奄乃大蒐於岐周則周成王時矣方楚合諸侯求大蒐



禮者不知宣王嘗蒐於岐山以令諸侯况小雅所美其地  
本東都又選車徒無大號令則不得爲盛節古者詩書不  
嫌同文其据以此便謂宣王未可信也呂氏紀曰蒼頡造  
大篆後世知有蝌蚪書則謂篆爲籀漢人書有大篆又有  
籀書張懷瓘以柱下史始變古文或同或異謂之篆而籀  
文蓋以其名自著宣王世史所作也如此論者是大篆又  
與籀異則不得定以史籀所書叔何曰昔成王盟諸侯於  
岐陽楚爲荆蠻置茅蕝當時以爲重禮故後世不得泯沒  
宣王蒐岐陽世遂無聞哉方成康與穆賦頌鐘鼎之銘皆



番吾之迹然則岐陽惟成王大會諸侯則此爲番吾可知  
書言成湯狩於亳故後世有亳亭宣王狩於敖敖其在地記  
則著敖亭詩曰搏獸於敖其事可以考矣周書紀年於蒐  
之大皆書則合諸侯而頒大命亦一見於成王此其可信  
也昔人嘗怪自漢以來好奇者皆不道此書乃不得秦文  
若者猶得人入錄藏之當漢號史書以刻畫奇崛蓋亦不  
得書其文其不見道固宜獨怪愈於唐中世得之乃謂勒  
勲以告萬世又恨聖人於詩不得見之石鼓之譌自杜甫  
尚嘆不知愈何以知意謂編詩者有遺也或曰此成王時



詩則頌聲所存聖人不應去之果有豈不知耶曰轡之桑  
矣作洛皇門此周公作也詩書不得盡見將一時所訓非  
理亂所繫不足施後世者不得著也其因後代亡之亦未  
可知曰子信成王頌則其說使人盡得信乎曰蒐於岐陽  
書傳再見而車攻之獵詩以爲敖此可謂無所据乎余考  
古而知之世亦安得異吾說者

詛楚文辨

董道

秦自文世有三石初得大沈湫於岐又得巫咸文於渭最  
後得亞駝文於洛其詞盡同惟所用以質於神者則隨其



號以異書盡奇古間存鐘鼎遺制亦或雜有秦文蓋書畫  
始變者也歲久漸以剝缺因据舊本得其完書此秦八底  
誓於神叙國之信作盟詛之載詞者也大沈故湫在朝那  
當漢安定郡方四十里巫咸祠在安邑巫咸山下臨鹽水  
亞駝則在晉爲溫夷其傳自周秦爲著祀則底而致信於  
禮則然其在盟詛於主要誓大事在盟小事在詛若詛誓  
而求厭則唯後世末俗行之非古也秦楚之會著於書者  
不詳見不知其同盟者幾何歲而質於神者如是衆也當  
其時唯岐陽之盟最盛且顯餘不見於書今考其詞若出



一時又不知其何日會盟安得親質秦都又遍朝那靈邱  
耶前世疑楚無熊相而秦楚初未相構豈有相趣以十八  
世之盟誓哉然春秋時楚本熊穴後世以熊爲號又以傳  
自熊霜又謂熊相其間如熊相祿熊相宜僚熊相祈而姓  
書熊相爲芊姓方其盟質於神焚亦再世失秦則詛盟宜  
非一人古者列國有書類不主名其告於神亦惟曰嗣王  
則楚以其姓此其稱也然自成王後其見於經者蓋平王  
以無忌娶秦女昭王亡而秦使子蒲子尾赴難其在威懷  
間始合盟然謂十八世者亦可得而見也今日昔我穆公



及楚成王親質大沈故湫以其時考之楚成王十三年而  
穆公立其相與假尊周者蓋二十三年雖不知其何時親  
質然知其會盟之日最爲長且久也然質於亞池安邑湫  
淵果知非一時其爲詛且宗祀分致以告於神矣且楚自  
成王十八世爲莊襄其頃襄時楚猶盛故秦以連橫爲雄  
楚以約從爲霸當此時天下諸侯不歸秦則歸楚楚使諸  
侯析符求合亦可謂威強盛大宜秦人之畏也張儀以地  
詐楚則齊與楚合今視其詞則有新郢及郢是則商於也  
其後秦虜楚之屈匄楚悉國兵復與秦戰則所謂攻我社



稷伐滅我百姓而秦猶分漢中以和楚然則背犯盟而詛  
於神者此其爲秦惠文時也懷王死頃襄王立當時猶以  
天下之勢在楚漢中析酈可得而復山東河內可得而一  
勞民休衆南面稱王矣於是襄王復與諸侯約從則所謂  
率諸侯之兵以臨加我然則秦之詛楚爲頃襄也嗚呼武  
關之詐則沒而不書及酈長敕猶謂楚人背犯盟詛志其  
神而公怨之其自以求信於神者妄也然文詞簡古猶有  
三代餘習非之罟瑯琊可况此其爲可傳也

告封太白山明應公祝文

宋郡倅 蘓軾 眉山



重修鳳翔縣志 卷之七  
天作山川以鎮四方俾食於民以雨以暘惟公聰明能率  
其職民以早告應不踰夕帝謂守臣予嘉乃功惟新爵號  
往耀其躬在唐天寶亦賜今爵時維術士採符採藥謂爲  
公榮實爲公差中原顛覆神不顧救今皇神聖惟民是憂  
民旣飽溢曾無禱求衮衣煌煌赤舄繡裳捨舊卽新以祐  
我民

醺土火星青詞

蘓軾

嗚呼天之保祐下民罔不至所資以生罔不蕃育民旣不  
知德天亦維不勸乃朝夕戕取以厚厥躬天旣不我咎乃



不恭畏於神祇不修勅厥心驕淫矜夸以干上帝威命帝  
用不赦丕降罪疾於下則惟雨暘常以訖黍稷禾菽桑麻  
我民用蕩析隕越天亦終哀矜其忍剪棄其命罔予遺今  
秦民既不獲於秋乃十旬弗雨曰其尚克有夏走於山川  
鬼神亦罔不至既不獲乃熒惑鎮星次於井秦民其亦應  
受多罪茲用卽於齋宮爲壇位以與百姓請命嗚呼其庶  
幾哀之俾克有夏亦克蒞厥秋民今其栗栗朝不能夕

劉訓導自爲墓誌

明歲貢劉 慧 邑人

劉慧字睿中原籍鳳翔縣桃原里人祖世相傳本支繁昌



詩書冠蓋代不乏人叙不及備余曾祖諱江鄉飲賓祖諱  
迥壽官父諱思進俱耕南立家父生四子余居其幼甫七  
齡就館年十八備弟子員十九先父見背母屈氏相繼遐  
升諸兄另爨余甚孤苦惟力學不少輟年三十食餼於庠  
屢入闈有志未逮究以明經除授岷州學訓及涖任宮牆  
荒廢奏斧資構齋房數楹聊爲棲止每朔望瞻拜先師殿  
庭木瓦脫落風雨飄搖余惻然積歲餘俸捐修重新余不  
敢爲功但根本地豈可忘庠生趙秉成抱母憂未考臨闈  
服闋余印結起送應試果捷余不敢爲德但功名事豈可



誤司鐸三載凡事奉職無曠元配孺人張氏庠生張義女  
素嫻閨德歸余家躬主蘋蘩親操井臼刑家相夫不減古  
昔孟與梁也余胞兄蚤亡遺孤四歲張氏恤之撫猶已出  
後娶妻生子以承兄祀余祖居東關因流氛遷城營屋十  
餘間嗣被防兵威占余攜眷屬避鄉堡未幾賀逆變防兵  
潰北余同姪劉大昇顧家突被賊擄拷索馬騾酷烈慘極  
余懇出城求貸不許姪跪願以首贖釋余至鄉馬騾無所  
措親友切勸無復往張氏泣曰姪將奈何竟以首飾衣物  
湊借數金入城賊喜且云信人也義人也共話一夜叔姪



俱保全嗟乎余夫婦年俱將耄一生惟家庭倫理間俯仰無愧怍爾素日親故接以溫厚奴下待以和平從來足不履訟庭身不趨外行固執守拙僅此而已余疾迫稍能執筆特遺之齋署示子孫知所循轍而守焉臨合葬不可倩人爲文恐浮辭虛譽失余生平宜以此爲誌

劉侍御墓誌銘

明進士袁楷  
邑人

侍御安侯之勃姓劉氏初名之鳳第後改今名世爲鳳翔縣佐陽里人曾大父景明大父世芳皆潛德不仕考寵贈徵仕郎行人司行人妣王氏贈孺人生五子公其季也五



歲有延贈翁酒者攜公前往予之果不食詰之曰吾父未  
食耳姻戚異焉曰是兒後必爲孝子七歲就傳讀語孟曉  
大義爲舉子業好深沉之思不作猶人語天啓丙寅入府  
庠每試冠多士爲廩生丁贈翁憂毀瘠盡禮旣祥親黨延  
爲塾師呼妓爲先生壽公艷然曰吾未除衰絰而命妓是  
陷我不孝且何爲若子師卽曰辭歸不復往崇正癸酉舉  
於鄉甲戌成進士觀政工部丁太孺人憂服除授行人司  
行人三使藩封諸餽遺悉卻不受所過訪問風俗及民間  
利病吏治得失曰此皇華職也辛巳九月俸歷五年時中



外孔棘天子旰食思得直亮耳目之臣拔置臺省以勸勦  
多難召侯考諸臣集中左門賜茶餅訖親諭以軍興浩繁  
連年加派念切如傷裕國恤民有何長策復出御劄一道  
申明諭意而加詳焉公奏言用繁民窮誠如皇上所慮臣  
請先言民窮而後言財用今天下之民寇傷兵傷饑傷疫  
傷者不知凡幾無民何以有財臣以爲今日別無生財之  
法止有節財之法且如需兵之地常苦無兵不需兵之地  
反苦有兵何故以無用之兵耗有用之餉况老弱當汰冒  
支當清者又不知其幾臣之所謂宜節者一也又官員末



秩固宜裁汰如新設總督總兵叅謀等官皆祖制所無事  
可兼攝何取備僚且此等官平時以一人費千百人之餉  
臨敵又以千百人衛一人之身不但耗餉兼以耗兵臣之  
所謂宜節者二也臣又聞金作贖刑虞書志之臣謂一切  
罪犯除強盜殺人外罪無大小俱令輸鍰自贖一可以紓  
司農之急一可以廣好生之仁臣愚所見理財之道不過  
如此然總之在大小臣工以謀身家之念謀國事何財之  
不足何民之不裕內寇外侵俱不足平矣上親灑宸翰錄  
其奏語越十日授公四川道試監察御史公自念一介書



生五載星署徒以造次數言立躋臺班非捐糜何以報稱  
九月十九日疏題災亂之故補救之宜爲四條一曰法天  
道二曰盡地利三曰定國是四曰選將材又題清節六事  
一草場招買陳腐一水衡工役浮數一各鎮兵馬盈縮一  
上供諸物贏餘一光祿諸費冗濫一添設督撫叅謀等官  
踰制此皆可清節以佐軍餉者也時京師頗營寺觀修齋  
醮公疏曰仙佛之道大要清淨慈悲爲本皇上取其清靜  
者以治心凡政事云爲之際無不白得一清靜取其慈悲  
者以救世凡刑罰征役之間無不各付一慈悲是則大聖



人之作用百家諸子俱在所節取非真向羽客縑流祈冥  
祐結福緣也且仙佛不過一隱修自了之人卽今日而在  
俗之以禮樂兵農之畧戡亂致治之務必遜爲不逮况取  
其道於千百世之後乎譬之問塗趨燕而問燕趨越而問  
越理也趨燕而問越趨越而問燕豈理也哉皇上問塗於  
已經堯舜禹湯文武其彼岸之先登也孔顏曾孟及歷代  
名儒皆津途之前導也自仙佛而言當體其清靜慈悲之  
心不當奉以所不欲自帝道而言當持其綱常名教之大  
不當務其所不同省其所費以之養饑民則萬年根本之



圖也以之佐軍需則一時飽騰之資也是帝王之道卽仙佛之心矣奉旨朕祇遵成憲以泰道治世原無偏向有何營修等費這本意在效規實屬未諳自是內醮希矣先是崇正初年罷東廠北司至是復設公疏曰天道先春而後秋帝道先禮而後刑惟我太祖得其全惟我皇上彙其成奈庶位百司莫盡承流宣化之實故緝奸安民仍多耳目伺察之寄所以東廠停而復用然臣有疑者東廠緝獲時聞北司考比日著亦可謂網密無遺矣宜乎膽落奸宄星沉貫索乃今日治效何如也請得爲皇上陳之國家以刑



政付法司如五城及巡按等官專察訪之責司寇則按律  
定罪廷尉則原情平反此立法意也緝訪旣屬東廠尉臂  
旁掣監察始有不能勾攝之奸初招旣定司寇且爲依樣  
承行之吏至大理各官更將爲無用贅員此不便於官守  
也律例越訴有禁一詞告二事不理非兩造俱陳不罪此  
定法也今各處刁民度府道州縣難售其奸始赴廠告首  
甚至道路遠經千里姓名半多假捏片紙株連嗟九牛之  
莫拔一字干涉見萬貫之立傾此不便於民隱也更可憂  
者上下相維而後有世道尊卑相制而後有國體今緝訪



所獲或以子弟而訐父兄或以奴僕而訐家主或以屬役而訐官長雀角一任所爲誰念加貴加尊之條鴟啄莫破其巧究成相陵相爭之世此又不便於國體也奉旨緝奸原以安良本內各處刁民巧詞告首假捏株連甚之加貴加尊體統凌遲委宜嚴禁用佐昇平舊輔楊嗣昌議增勦兵十二萬天下加練餉二百六十餘萬公疏言勦兵之效安在而餉之出於民者粒粒不饒也今當核兵以寬餉凡兵荒已甚地方仍分別蠲緩以慰人心蓋實實有無人有地有人無粟州縣催之無以濟用蠲之足以明德又言封



疆死事之臣宜恤以表忠節囚繫諸臣宜宥以責後效輔  
臣魏照乘屢被糾彈溫旨慰留公疏言輔臣物議彰聞就  
列汗顏以半留半去之心而再效捐糜恐天下無此人情  
若予若奪之權而欲收亮績恐千古無此治效又糾總督  
丁啓睿張福臻巡撫高明衡王公弼庸猾怯懦劣陋無爲  
今日之患止在就將嘗試四字祖宗封疆豈宜再誤且知  
其不才而舍之與當其已敗而罪之所爭只在疾徐而利  
害判若霄壤爲計安得不早哉十五年奉命巡按四川自  
疏有熱血堪滴頂踵敢愛之語至則懲奸剔蠹壹以惠文



從事而尤以綏善良弭釁變爲兢兢於漢州建六石橋闢  
五丈下爲十九洞自蠲緩金三萬兩爲文記之甲申巡歷  
已竣於新繁侯代七月劇賊張獻忠自楚入蜀所過破降  
人無固志撫臣龍文光同蜀王復邀公至成都議固守之  
策公捐贖緩倡先宗藩紳士各助金有差登陴畫地申嚴  
約束八月初六日賊數十萬已至城下九日公督胡王二  
總兵出西門迎戰馬蹶副將楊展以已馬授公復死戰而  
龍文光及蜀王已開北門遁矣於是城中大亂賊入城公  
被執不屈賊巨梃交下抑公命跪公氣愈厲罵愈烈是日



卽不食賊必欲降公令汪兆麟胡墨跪勸公食公不應次  
日呼門生武舉楊景新索紙筆作歌曰吾親久已亡非君  
安所之搖搖孤臣影徘徊獨有思我來自北鄉山川何翠  
微只今草木色依舊春芳菲烟塵千萬里去路苦迂遲轉  
擬忠孝魂願作杜鵑飛飛向北闕繞帝旃飛向北土傍墓  
田若謂杜鵑合有死魂隨箕尾訴帝前逆賊應不共世界  
葬厥骨今峨嵋巔賊怒公終不屈同內江王釘門柱左右  
亂箭射之皆罵不絕口又二日方卒時八月十五日申時  
按院書役同公姪文郁葬公西門外刻石記之年三十八



公生有至性不妄言笑遇姻戚盡恩禮交友終始不渝姪  
文郁甥女郭氏奉母王孺人命囑公善視公撫教文郁成  
立爲諸生卒同公死難迎郭氏至家與已女同處擇聘雷  
門粧奩無異已女庚辰歲大飢迎養繼叔母羅氏歿身不  
怠宗族待舉火者三四十人鄰里亦賙給免轉溝壑甚衆  
公鄉薦座誦馬公卒無子公過杞縣奠祭盡哀訪其族姪  
立嗣焉貧生任士英謁公詢其業儒卽館穀教以舉子業  
士英入庠爲之婚娶遂爲二子師公將按蜀便道過里爲  
家人言吾有異夢久不言疇昔之夜夢神人象簡衣朱捧



書自天而下曰上帝以生民稔惡將大爲沙汰吾驚曰我  
皇上無損乎神默然色甚慘曰於我何如神曰爾非臨難  
苟免人也公幼請乩仙仙書流芳百代四字示之取義成  
仁神固早知之矣順治丁酉祀公於鄉十八年成都祀名  
宦配馮氏封孺人孺人事舅姑孝待妯娌和克相夫子內  
外肅穆於夫族戚黨不計有亡多所贍助聞公之殉難也  
旣慟絕復自勉曰有二幼兒是固在我遂以母道兼父道  
課督俱入膠庠後公十八年卒公歿之十八年蜀道通適  
馮孺人之變家男文燦居喪仲子文煌重趼三千里訪父



柩至成都遇故吏石璞昔葬公者今爲僧適自峨嵋來遂  
得公瘞所奉柩還里銘曰有生必終如夜旦焉睽目瞑目  
馨穢大懸彼怖死者誰其久生同草木腐長蒙惡聲此舍  
生者不過一死理順心安扶植人紀明禩之末臣道如市  
篤厥忠貞有劉御史正色立朝指佞觸邪箴諫弼違帝用  
汝嘉攬轡蠶叢妖夢是踐一瞑如歸丹心不變萬矢集躬  
若射枯木魂昭於天魄亦無辱秦蜀阻修越惟廿祀間關  
求觀公有孝子岐山之陽卜吉爲窆我銘不磨詔億萬世

按劉侍郎殉難事蹟詳見墓誌郡志節訂從郡守劉組  
曾志畧也茲刻仍依原本俾景仰芳躅者得聞其詳云



讀史詠三良 五言古

魏曹植

功名不可爲忠義我所安  
秦穆先下世三臣皆自殘  
生時等榮樂旣沒同憂患  
誰言捐軀易殺身良獨難  
攬涕登君墓臨穴仰天嘆  
長夜何冥冥一往不復還  
黃鳥爲悲鳴哀哉傷肺肝

前題

魏王粲

自古無殉死達人所共知  
秦穆殺三良惜哉空爾爲  
結髮事明君受恩良不訾  
臨沒要之死焉得不相隨  
妻子當門泣兄弟哭路陲  
臨穴呼蒼天涕下如縷縻  
人生各有志終



不爲此移固知埋身劇心亦有所施生爲百夫雄死爲壯士規黃鳥作哀詩至今聲不虧

前題

晉陶潛

彈冠乘通津但懼時我遺服勤盡歲月常恐功愈微忠情  
謬獲露遂爲君所私出則陪文輿入必侍丹帷箴規嚮已  
從計議初無虧一朝長逝後願言同此歸厚恩固難忘君  
命安可違臨穴罔惟疑投義志攸希荆棘籠高墳黃鳥聲  
正悲良人不可贖泫然沾我衣

代扶風主人答

唐王昌齡



殺氣凝不流風悲月彩寒浮埃起四遠遊子迷不歡依然  
宿扶風沽酒聊自寬寸心亦未理長鋏誰能彈主人就我  
飲對我還慨然便泣數行淚因歌行路難十五役邊城三  
迴討樓蘭連年不解甲積日無所餐將軍降匈奴國使沒  
桑乾去時三十萬獨自還長安不見沙場苦君看刀箭瘢  
鄉親悉零落塚墓亦摧殘仰攀青松枝慟絕傷心肝禽獸  
悲不去路旁誰忍看幸逢休明代寰宇靜波瀾老馬思伏  
櫪長鳴力已殫少年與運會何事發悲端天子初封禪賢  
良刷羽翰三邊悉如此否泰亦須觀



登潛山觀

舊在鳳翔  
蹟今無考

唐實參

邑人

山勢欲相抱一條微徑盤攀蘿歇復行始得凌仙壇皆道  
葛夫子此中煉還丹丹成五色光服之生羽翰靈草空自  
翠餘霞誰共餐至今步步虛處猶有孤飛鸞幽幽在殿門下  
壓浮雲端萬丈水聲落四時松色寒旣入亡何鄉轉嫌人  
事難終當遠塵俗高卧從所安

送岐州源長史歸

唐王維

握手一相送心悲安可論秋風正蕭瑟客散孟嘗門故驛  
通槐里長亭下槿原征西舊旌節從此向河源



北征

至德二載公自鳳翔還鄜州

唐杜甫

皇帝二載秋閏八月初吉杜子將北征蒼茫問家室維時  
遭艱虞朝野少暇日顧慙恩私被詔許歸蓬華拜辭詣闕  
下怵惕久未出雖乏諫諍姿恐君有遺失君誠中興主經  
緯固密勿東胡反未已臣甫憤所切揮涕戀行在道途猶  
恍惚乾坤含瘡痍憂虞何時畢靡靡踰阡陌人煙眇蕭瑟  
所遇多被傷呻吟更流血回首鳳翔縣旌旆晚明滅前登  
寒山重屢得飲馬窟邠郊入地底涇水中蕩潏猛虎立我  
前蒼崖吼時裂菊垂今秋花石戴古車轍青雲動高興幽



事亦可悅山果多瑣細羅生雜橡栗或紅如丹砂或黑如  
點漆雨露之所濡甘苦齊結實緬思桃源內益歎身世拙  
坡陀望鄜時谷巖互出沒我行已水濱我僕猶木末鴟鳥  
鳴黃桑野鼠拱亂穴夜深經戰場寒月照白骨潼關百萬  
師往者散何卒遂令半秦民殘害爲異物况我墮胡塵及  
歸盡華髮經年至茆屋妻子衣百結慟哭松聲迴悲泉共  
幽咽平生所嬌兒顏色白勝雪見爺背面啼垢膩腳不襪  
牀前兩小女補綻才過膝海圖折波濤舊繡移曲折天吳  
及紫鳳顛倒在短褐老夫情懷惡嘔泄卧數日那無囊中



帛救汝寒凜慄粉黛亦解包衾裯稍羅列瘦妻面復光癡  
女頭自櫛學母無不爲曉粧隨手抹移時施朱鉛狼籍畫  
眉闊生還對童稚似欲忘飢渴問事競挽鬚誰能卽嗔喝  
翻思在賊愁甘受雜亂聒新歸且慰意生理焉得說至尊  
尚蒙塵幾日休練卒仰看天色改旁覺妖氛豁陰風西北  
來慘澹隨回紇其王願助順其俗善馳突送兵五千人驅  
馬一萬匹此輩少爲貴四方服勇決所用皆鷹騰破敵過  
箭疾聖心頗虛佇時議氣欲奪伊洛指掌收西京不足拔  
官軍請深入蓄銳伺俱發此舉開青徐旋瞻畧恒碣昊天



積霜露正氣有肅殺禍轉亡胡歲勢成擒胡月胡命其能  
久皇綱未宜絕憶昨狼狽初事與古先別姦臣競殖醢同  
惡隨蕩折不聞夏殷衰中自誅褒姒周漢獲再興宣光果  
明哲桓桓陳將軍仗鉞奮忠烈微爾人盡非于今國猶活  
淒涼大同殿寂寞白獸闌都人望翠華佳氣向金闕園陵  
固有神掃除數不缺煌煌太宗業樹立甚宏達

過扶風精舍舊居

唐韋應物

佛剎出高樹晨光間井中年深念陳跡迨此獨冲冲零落  
逢故老寂寞悲草蟲舊宇多改構幽篁延本叢栖止事如



昨芳時去已空佳人亦攜手再往今不同  
新文聊感舊想子意無窮

詠三良

唐柳宗元

束帶值明君顧盼流輝光一心在陳力  
鼎列夸四方款款効忠信恩義皎如霜  
生時亮同體死復寧分張壯軀閉幽隧  
猛志填黃壤殉死禮所非況乃用其良  
霸業弊不振晉楚更張皇疾病命固亂  
魏氏言有章從邪陷厥父吾欲討彼狂

哀張子厚先生

宋司馬光



先生負材氣弱冠游窮邊麻衣揖鉅公決策期萬全謂言  
叛羌輩坐可執而鞭意趣小參差萬金莫留連中年更折  
節六籍事精研義農訖周孔上下皆貫穿造次循繩墨儒  
行無少愆師道久廢闕模範幾無傳先生力振起不絕尚  
聯縣教人學雖博要以禮爲先庶幾百世後復覩三王前  
釋老比尤熾羣倫將蕩然先生論性命指示令知天聲光  
動京師名卿爭薦延寘之石渠閣豈徒修簡編丞相正自  
用立有榮枯權先生不可屈去之歸卧堅孤嫠聚滿室餬  
口耕無田欣欣茹藜藿皆不思肥鮮近應詔書起尋取病



告旋舊廬不能到丹旄風翩翩人生會歸盡但問愚與賢  
借令陽虎壽詎足驕顏淵況於朱紫貴飄忽如雲烟豈若  
有清名高出太白巔門人俱經帶雲梯會松阡厚終信爲  
美繼志仍須專讀經守舊學勿爲利祿遷好禮效古人勿  
爲時俗牽修內勿修外執中勿執偏當今洙泗風郁郁滿  
秦川先生儻有知無憾歸重泉

鳳邑有張子  
祠因並附此

### 詛楚文

宋 蘇軾

崢嶸開元寺彷彿祈年觀舊築掃成空古碑埋不爛詛書  
雖可讀句法嗟久換詞云秦嗣王敢使祝用瓚先君穆公



世與楚約相捍質之于巫咸萬葉期不叛今其後嗣王乃  
敢構多難刳胎殺無罪親族遭圍絆計其所稱訴何啻桀  
紂亂吾聞古秦俗面詐背不汙豈惟公子卬社鬼亦遭謾  
遼哉千歲後發我一笑粲

東湖

蘇軾

吾家蜀江上江水綠如藍邇來走塵土意思殊不堪况當  
岐山下風物猶可慙有山禿如赭有水濁如泔不謂郡城  
東數步見湖潭入門便清澳恍如夢西南泉源從高來隨  
坡走涵涵東去觸重阜盡爲湖所貪但見蒼石礪開口吐



清甘借汝腹中過胡爲目眈眈新荷弄晚涼輕權極幽探  
飄飄忘遠近偃息遺佩簪深有龜與魚淺有螺與蚌曝晴  
復戲雨戢戢多于蠶浮沉無停餌倏忽遽滿籃絲緝雖強  
致瑣細安足戡聞昔周道興翠鳳棲孤嵐飛鳴飲此水照  
影弄毳毳此古飲鳳池也至今多梧桐合抱如彭暉綵羽無復見

上有鸛搏鵠嗟予生雖晚考古志所耽圖書已漫漶猶復  
訪僑郟卷阿詩可繼此意久已含扶風古三輔政事豈汝  
諳聊爲湖上飲一從醉後談門前遠行客劫劫無留驂問  
胡不回首無乃趨朝參予今正疎嬾官長幸見函不辭日



重修鳳翔縣志 卷之七  
游再行恐歲滿三暮歸還倒載鐘鼓已錯錯

真興閣

舊在城中  
今廢

蘇軾

山川與城郭漠漠同一形市人與鴉鵲浩浩同一聲此閣  
幾何高何人之所營側身送落日引手攀飛星當年王中  
令斫木南山頽寫真留閣下鏤面眼有稜身長八九尺與  
閣兩崢嶸占人雖暴恣作事令世驚登者尚吁喘作者何  
以勝曷不觀此閣其人勇且英

李氏園

唐李茂  
貞築

蘇軾

朝游北城東回首見修竹下有朱門家破牆圍古屋舉鞭



扣其戶幽響客空谷入門所見夥十步九移目異花兼四  
方野鳥喧百族其西引溪水活活轉牆曲東注入深林林  
深牕戶綠水鮮兼竹淨時有獨立鵠林中百尺松歲久蒼  
鱗簇豈惟此地少意恐關中獨小橋過南浦夾道多喬木  
隱如城百雉挺若舟千斛陰陰日光淡黯黯秋氣蓄盡東  
爲方池野雁雜鷗鷺紅梨驚合抱映島孤雲馥春光水溶  
漾雲陣風翻撲其北臨長溪波聲捲平陸北山卧可見蒼  
翠間磽磽我來時周覽問此誰所築云昔李將軍負險乘  
衰叔抽錢算閒口但未權羹粥當日奪民田失業安敢哭



誰家美園圃籍沒不容贖此亭破千家鬱鬱城之麓將軍  
竟何事磯虱生刀韉何嘗載美酒來此駐車轂空使後世  
人間名頸猶縮俗猶呼皇后園蓋茂貞謂其妻也我今官正閒屢至園休  
沐人生營居止竟爲何人卜何如辦一身永與清景逐

凌虛臺

舊在城東街今移置三公祠後

蘓軾

才高多感激道直無往還不如此臺上舉酒邀青山青山  
雖云遠似亦識公顏崩騰赴幽賞披豁露天慳落日銜翠  
壁暮雲點烟鬟浩歌清興發放意未禮刪是時歲云暮微  
雪灑袍斑吏退跡如掃賓來勇躋攀臺前飛雁過臺上雕



弓彎聯翩向空墜一笑驚塵寰

和陶詠三良

蘓軾

此生泰山重忽作鴻毛遺三子死一言所死良已微賢哉  
晏平仲事君不以私我豈犬馬哉從君求蓋帷殺身固有  
道大節要不虧君爲社稷死我則同其歸顧命有治亂臣  
子得從違魏顆真孝愛三良安足希仕宦豈不榮有時下  
生悲所以靖節翁服此黔婁衣

早發鳳翔至靈山鋪感興

明周京

夜雨滌煩暑曉風清路塵驅馬上高原衆山一何新野水



重修鳳翔縣志 卷之十一  
亂赴壑林光來媚人頓覺眉目開恍與懷抱親停車問往  
事變滅難具陳周興固有徵鳴岐應何神道衰乃終隱誰  
謂靈跡湮卷阿想餘韻何代無君臣

清明後一日按部之暇讌東湖宛在亭酬萬大叅

國朝茶馬

許之漸

常州人

聖湖別已久蕩漾紛在目芳菲遘良辰明霞散綺縠今來  
入秦川所昏罕停轂連山浩無垠飛埃翳荒陸披圖數感  
會迷方徒蹙蹙仲春達扶風周道良有蹟都忘令節臨檄  
書紛穎禿萬君饒美度念我欲投軸爲言鳳城東湖潭清



可掬蘓子倅郡時來游日往復清淺漲華池蓮香恣芬郁  
更建君子亭不愧愚公谷曲堤環淪漪山樽成小築西子  
擅東南明媚此所獨片雲對層城渺然矚清澳隴酒時再  
斟春盤陳苜蓿俯仰瑤池前想望崑崙麓淵淪黛色收杳  
靄燭光煜八懷延阻修塵坐覲炎燠緬焉念昔人適靜慮  
如沐豈無滄州情攜手返初服

穆公墓

國朝李栢  
郿人

秦穆居西陲奚蹇爲之傳能起非子彊武廓大駱步國計  
富且強西征復東渡救荆一何烈置晉復其祚河山旣百



二重以虎狼成開關噴欬唾諸侯皆西顧雄風吹落日遺  
命多錯誤不復爲盟主以殉三良故哀哉秦之人徒爲黃  
鳥賦千載隴山下浮雲空布濩霸業一片石書曰穆公墓

石鼓歌

七言古

唐韋應物

周宣大獵兮岐之陽刻石紀功兮燁煌煌石如鼓形數止  
十風雨缺訛苔蘚澀今人濡紙脫其文旣擊旣埽白黑分  
忽開滿卷不可識驚潛動蟄走云云喘息透迤相紕錯乃  
是宣王之臣史籀作一書遺此天地間精意長存世冥冥  
秦家祖龍還刻石刻石之果李斯跡世人好古猶共傳持



來比此殊懸隔

石鼓歌

唐韓愈

張生手持石鼓文，勸我試作石鼓歌。  
少陵無人謫仙死，才薄將奈石鼓何。  
周綱陵遲四海沸，宣王憤起揮天戈。  
大開明堂受朝賀，諸侯劍佩鳴相磨。  
蒐於岐陽騁雄駿，萬里禽獸皆遮羅。  
鏘功勒成告萬世，鑿石作鼓隳嵯峨。  
我從臣才藝咸第一，揀選譔刻留山阿。  
雨淋日炙野火燎，鬼物守護煩撝呵。  
公從何處得紙本，毫髮盡備無差訛。  
詞嚴意密讀難曉，字體不類隸與蝌。  
年深豈免有缺畫，快劍斫斷生蛟鼉。



鸞翔鳳翥衆仙下珊瑚碧樹交枝柯金繩鐵索鎖紐壯古  
鼎躍水龍騰校陋儒編詩不收入二雅編迫無逶迤孔子  
西行不到秦摘摭星宿遺義娥嗟予好古生苦晚對此涕  
淚雙滂沱憶昔初蒙博士徵其年始改稱元和故人從軍  
在右輔爲我度量掘白窠濯冠沐浴告祭酒如此至寶存  
豈多氈包席裏可立致十鼓祇載數駱駝薦諸太廟比郃  
鼎光價豈止百倍過聖恩若許留太學諸生講解得切磋  
觀經鴻都尚填咽坐見舉國來奔波剋苔剔蘚露節角安  
置安帖平不頗大厦深簷與蓋覆經歷久遠期無他中朝



大官老於事詎肯感激徒婣姍牧童敲火牛礪角誰復著  
手爲摩挲日銷月爍就埋沒六年西顧空吟哦羲之俗書  
趁姿媚數紙尚能博白鶩繼周八代爭戰罷無人收拾理  
則那方今太平日無事柄用儒生崇邱軻安能以此上論  
列願借辯口如懸河石鼓之歌止於此嗚呼吾意其蹉跎

石鼓

宋 蘇軾

冬十二月歲辛丑我初從政見魯叟舊聞石鼓今見之文  
字鬱律蛟蛇走細觀初以指畫肚欲讀嗟如箝在口韓公  
好古生已遲我今况又百年後強爭偏旁推點畫時得一



二遺八九我車旣攻馬亦同其魚維鱖貫之柳古器縱橫  
猶識鼎衆星錯落僅名斗模糊半已似癡牴詰曲猶能辨  
跟肘娟娟缺月隱雲霧濯濯嘉禾秀稂莠漂流百戰偶然  
存獨立千載誰與友上追軒頡相唯諾下挹冰斯同穀穀  
憶昔周宣歌鴻雁當時籀史變蝌蚪厭亂人方思聖賢中  
興天爲生耆耆東征徐淮闕虢虎北伐犬戎隨指嗾象胥  
雜沓貢狼鹿方召聯翩賜圭卣遂因鼙鼓思將帥豈爲考  
擊煩矇瞍何人作頌比崧高萬古斯文齊岫嶠勲勞至大  
不矜伐文武未遠猶忠厚欲尋年代無甲乙豈有名字記



誰某自從周衰更七國竟使秦人有九有掃除詩書誦法  
律投棄俎豆陳鞭杻當年何人佐祖龍上蔡公子牽黃狗  
登山刻石頌功烈後者無繼前無偶皆云皇帝巡四國烹  
滅強暴救黔首六經既已委灰塵此鼓亦當隨擊掊傳聞  
九鼎淪泗上欲使萬夫沉水取暴君縱欲窮人力神物義  
不污秦垢是時石鼓何處避無乃天公令鬼守興亡百變  
物自閒富貴一朝名不朽細思物理坐歎息人生安得如  
汝壽

穆公墓

在城內東南隅

蘇軾



橐泉在城東墓在城中無百步乃知昔未有此城秦人以  
泉識公墓昔公生不誅孟明豈有死之日而忍用其良乃  
知三子殉公意亦如齊之二子從田橫古人感一飯尚能  
殺其身今人不復見此等乃以所見疑古人古人不可望  
今人益可傷

王維吳道子畫

今廢

蘓軾

何處訪吳畫昔門與開元開元有東塔摩詰留手痕吾觀  
畫品中莫如二子尊道子實雄放浩如海波翻當其下手  
風雨快筆所未到氣已吞亭亭雙林間彩暈扶桑曦中有



至人談寂滅悟者悲涕迷者手自捫蠻君鬼伯千萬萬相  
排競進頭如黿摩詰本詩老佩芷襲芳蓀今觀此壁畫亦  
若其詩清且敦祇園弟子盡鶴骨心如死灰不復溫門前  
兩叢竹雪節貫霜根交柯亂葉動無數一一皆可尋其源  
吳生雖妙絕猶以畫工論摩詰得之于象外有如仙飄謝  
籠樊吾觀二子皆神俊又于維也歛衽無間言

維摩詰像

唐楊惠之塑舊在天柱寺今廢

蘇軾

昔者子輿病且死其友子祀往問之跼蹐鑒井自嘆息造  
物將安以我爲今觀古塑摩詰像病骨磊嵬如枯龜乃知



至人外生死此身變化浮雲隨世人豈不碩且好身雖未  
病心已疲此叟神完中有恃談笑可卻千熊羆當其在時  
或問法俯首無言心自知至今遺像兀不語與昔未死無  
增虧田翁里婦那肯顧時有野鼠銜其髭見之使人每自  
失誰能與詰無言師

以上四首合詛楚文東湖真興閣  
李氏園四首爲東坡鳳翔八觀詩

石鼓歌

畧節

明李延興

乾坤清淑之氣蜿蜒扶輿旦西極化作岐山之陽石鼓十  
六丁二酉鑿斷崑崙之瑤峯縹緲雲根墮穹碧層崖秋碎  
方祇愁大星宵隕圓靈泣中虛不露疏鑿文太素猶涵渾



池質偉哉周家宣王中興時戈鋌彗雲九縣一明堂受朝  
羣后來天威不違顏咫尺岐陽之狩載揚國之靈王氣騰  
霄何赫奕八鸞聲曼秋風高九旗光動朝曦赤歌車攻詠  
吉日張皇維昭帝績泰山磐石之祚炳烈千萬春勒之貞  
珉古無匹其形如鼓不可叩之鳴其體渾朴絕似大造無  
痕迹其字道逸宛是篆與蝌其文古雅髣髴周之什吉甫  
歌史籀筆制作森嚴照岐邑年多物化理則然金字半滅  
無人識老蛟摧裂野火焚古墨淋漓苔雨蝕青城學士昔  
在大德初見之林下久嘆息八朝亟爲丞相言如此至寶



何可以弃擲大車彭彭輓致來孔庭天地風雲亦動色我  
常愛此十鼓文字奇撫玩摩挲不知日之夕荏苒光陰數  
十春春風吹愁髮生白近時再過石鼓旁階草蒙茸沒雙  
屐細看字畫轉么麼徙倚迴廊淚沾臆東安鄧尹彈琴清  
桂林議論文章脫塵格平生好古如古人直欲蒐抉周秦  
之故實里中更有朱先生白首著書窮日力寄書遠訪石  
鼓文細字滿箋珠的皪書中宛宛見高情識者見之爭愛  
惜我生雅恨不能書每見名家如有失朱先生古遺直甚  
欲相從不可得山中茅屋書滿牀何時一到虛軒分半席



直須和我石鼓歌戰退韓蘓入堅壁嗚呼古之作者往往  
苦用心豈惟杜預雅有春秋癖今人無復見古人徒勞紙  
上賞遺墨魚目滔滔久混珍後來此鼓誰收拾燕之石等  
圭璧荆之璞同瓦礫古風不返天茫茫何如爛醉林臯卧  
苔石

前題

明李東陽

昔聞石鼓在太學鼓形穹窿石皴皴髻年釋褐隨班行未  
識研覃與揚摧始官翰林歲分獻晚以代祀觀尤數我思  
古人不可見健筆雄詞兩超卓宣王謨烈繼成康况有文



章存古樸是時風俗蓋渾灝其臣拜頌俱堅確勒功太廟  
告中興講武岐陽猶獵較於時旋凱奏饒歌於時颺言播  
聲樂靈祇地不愛圖書列石天然謝彫琢垂垂股折無漏  
痕隱隱昏星露芒角初如淮徐振師旅壯士當場鳴劍槊  
又如申甫端冠紳儼相聯階舞干簫年深歲長世運改誰  
向鴻荒究綿邈羸劉以後無此文真與渾沌分清濁驟看  
筆勢尋風骨細剔苔痕認斑駁原拋野擲墮榛莽冬經雪  
霜夏冰雹疑隳大鼎存銘識似毀明堂露榱桷當時石鼓  
一爲白猶幸農家事春馭愛惜應勞神護呵搜尋不厭山



曉曉暗中摸索亦可知辨口尚煩爭衆踣宋人空解寶燕  
石下氏祇知歸楚璞聖朝天子方好儒化雨恩波極霑渥  
戟門森嚴鼓羅列底以高簷護重幄見之起敬還興慕以  
手摩挲防擊撲我生學篆希前踪回視俗書羞齷齪力崇  
雅素去澆浮每向迷途問先覺家藏舊本出梨棗楮墨輕  
虛不盈握行年七十始效顰老臂支撐日昏眊邕書孔經  
炫秦刻格力雖殊苦形貌拾殘補缺能幾何萬一涓埃裨  
海嶽太原宋生生好奇鐵筆爲予親刻斲吁嗟往者不復  
還庶免方來盡消剝還從祭酒告諸生誦此衣冠日三濯



按石鼓唐宋俱在鳳翔故韋韓蘓作例得載入  
鳳志至有明二李以名篇不忍割愛並附之

題大金佛寺方上人一庵

明左叅政梁

璟  
人 崢山

禪僧方一庵立志在瞿曇僧錄官辭卻獨將至理叅幾年  
留薊北飛錫去江南江南江北跋涉徧古刹禪林都經見  
一朝望雲思萱堂過水登山來鄉縣鄉中故舊苦相留朝  
翻貝葉夕還憂所憂不關名與利直超彼岸意方休彼岸  
不在形迹求果然只在此心頭心頭放下歸於密事理雙  
忘了無迹我本耕讀一閒身出入虞廷幾度春昨奉除書  
專宣布揚鞭驅馬來三秦三秦偶與一庵遇話談不厭經



朝暮我爲重重世網牽明朝又欲分岐路一庵一庵心已  
定我猶未得趨三徑何時擺脫返故原縱浪大化消逸興

讀王公麒梅花詩寄贈

明太史康海武功人

十月君來潯西口手出新詩百餘首苦詠梅花不肯休奇  
怪妖嫵體俱有君才倜儻眼底稀揮毫時遣蛟龍走志士  
遭窮古所難羨爾豪華茂升斗近聞東訪楊使君長安車  
馬動如雲杯酒相逢休極意世間萬事盡紛紜不如早跨  
蹇驢出醉我東山翡翠裙

四過東湖題宛在亭

國朝王士正



小鴨唼喋萍葉亂三枝五枝菡萏開魯連陂上花千頃黃  
帽刺船歸去來

登鳳翔城望太白山

國朝李根茂

汝陽人

太白去天纔三百每怪山經誌荒唐邇來汗漫遊岐下果  
見高峯蹴穹蒼太華堪伯仲吳嶽難頡頏南北分明晦冬  
夏異炎涼巍巍直上幾萬仞爭雄五嶽霸金方絕頂崖嵌  
太古雪界破青天白茫茫此山不知何年始勢吞終南壓  
渭水世傳元德古洞天蛇盤鳥攏空中起巖岫高深不可  
窮仙境周匝五百里又聞幽谷有湫淵神龍出沒窟穴裏



膚寸雲台遍雍州豐隆屏壁隨鞭弭谷春祠南絕人煙鳥  
啼猿嘯虎盤桓中有龐眉不死人坐蔭松栢聽流泉薜荔  
綰衣帶芝朮供盤餐緱嶺瑤笙吹湘江寶瑟彈滄桑變改  
長紅顏太息人間歲月促願隨杖履學延年碌碌塵海迴  
難越何時裹糧一躋攀嗚呼何時裹糧一躋攀

讀袁經畧殉難事蹟有感

李根茂

先生建牙日誓清瀚海波明運逢百六壯志竟蹉跎憶昔  
襄平原上戰烈風吹沙撲人面擊鼓起土鼓不鳴麾下偏  
裨鳥獸散先生獨力守孤城黑雲壓城白日暝敵人蟻附



重修鳳翔縣志 卷之七  
短兵接大呼薄城城欲傾南向再拜臣力竭敢愛一身負  
聖明先生死後七十載慷慨就義公論在當時誤國是何  
人風景不殊山河改我來岐下閱公表箐燈讀罷傷懷抱  
凜凜生氣至今存化作箕尾燦蒼昊

題劉侍御表忠錄

李根茂

昔時劇賊入西川眉山錦江絕人烟繡衣使者劉侍御欲  
鍊碎石補漏天身先士卒揮長劍七星橋邊相拏戰戰罷  
歸來城已空仗節中丞抱頭竄賊重公名欲降公游說萬  
端志不變大呼罵賊賊始怒甘將一身受亂箭是時同死



有司李

推官劉光斗同被執大呼謂公曰莫錯主意做好漢子正在此時

誓作厲鬼誅逆

叛嗚呼國事不可爲朝廷用人如亂絲盧杞調羹總百寮  
童貫秉鉞統六師厝火積薪共寢處不急公室急營私南  
北分門各植黨那教九鼎不遷移夙聞關西有烈士五十  
年後過公里丈夫立身孝與忠岳峙川流公不死携公實  
錄向明牕讀罷悲風蕭颯起

題劉侍御表忠錄後

國朝李栢 郿人

張賊殺活天下士乃是鳳翔劉御史當時一日不求生至  
今御史何嘗死憶昔逆闖犯闕時文武調笑如不知先皇



重修鳳翔縣志卷之七  
本足神明主洞悉時勢不可爲蒼黃披髮燎山上龍去鼎  
湖弓髯垂先朝養士三百年摧朽拉枯多披靡豈知輶軒  
採風人乃是死義報國臣君死社稷臣死君阿咸死叔節  
嶙峋君恩家訓兩得矣大忠大孝一門真他年君臣同閔  
宮烝嘗俎豆秋復春

自京竄至鳳翔喜達行在所三首

五言律

唐杜甫

西憶岐陽信無人遂卻回眼穿當落日心死著寒灰茂樹  
行相引連山望忽開所親驚老瘦辛苦賊中來



愁思胡笳夕淒涼漢苑春生還今日事間道暫時人司隸  
章初睹南陽氣已新喜心翻倒極嗚咽淚沾巾  
死去憑誰報歸來始自憐猶瞻太白雪喜遇武功天影靜

千官裏心蘓七校前今朝漢社稷新數中興年

此詩前人載入鄆志又載入武功志以有太白武功等句也按唐肅宗幸鳳翔改扶風爲鳳翔郡題曰自京竄至鳳翔統辭也今載入鳳翔或不失少陵本志云

宿岐州北郭嚴給事別業

唐岑參

郭外山色暝主人林館幽疎鐘入臥內片月到牀頭遙夜  
惜將半清言殊未休君雖在青瑣心不忘滄州



宿鳳翔天柱寺易元上人房

唐李洞

天柱暮相逢吟思天柱峰  
墨研清露月茶吸白雲鐘臥語  
身黏蘚行禪頂拂松探元爲一決  
明日去臨邛

十一月中旬至扶風界見梅花

唐李商隱

匝路亭亭艷非時  
裊裊香素娥惟與月青女不饒霜贈遠  
虛盈手傷離適斷腸爲誰成早秀不待作年芳

竹閣

在李氏園

宋蘇軾

殘花帶雨暗新筍出林香但見竹陰綠  
不知汧水黃樹高  
傾隴鳥池浚落河魴栽種良辛苦孤僧瘦欲庭



東湖

明叅政 吳同春 人 固始

積水收殘照孤城落晚烟圖翻花外鳥鏡坐樹中船劇飲  
留春徑嬌歌徹夜筵良辰懷自好直訝共尋仙

東湖雜咏 二首

明叅政 姚孟昱 人 姑孰

城角注湖光源深流亦長清波澄下際瀨影蕩中央荷擎  
浮玉碧柳吐綻金黃莫辭今夕勸明月泛滄浪

爲攬東湖勝聊乘問俗閒川源通渭水泉脈透秦關徵歌  
堪適意對酒且開顏維舟邀夜月漏盡不知還

前題 二首

明廉憲 邢雲路 人 安肅



朋好合風光維舟引興長景涵天上下人在水中央岸柳  
含衣綠晴波射酒黃更堪修禊事新月下滄浪

追賞耽浮景春游白日閒采鳳來穆穆好鳥語關關水荇  
牽衣帶林花上酒顏乘槎牛斗宿天路不知還

前題 二首

明叅政 岳萬階

朝城人

新月映湖光從流逸興長披膠情更篤飛羽樂無央竹影  
搖波綠梅粧照酒黃坐聽盈耳奏鈞樂下滄浪

最愛艷陽景且偷忙裏閒清言頻對酌樂意兩相關雲影  
搖仙舫花光開笑顏和風收滿袖載月夜深還



前題

明郡守趙光大興

睠此鳳城東原泉一脈通波澄魚泳藻風靜鳥鳴叢浴德  
思周澤流膏慕長公慙予典郡牧何道潤疲癯

授經臺

明學憲何景明信陽人

西海何年去南山萬古存風雲留福地星斗上天門有欲  
誰觀妙無爲自覺尊青牛不復返空誦五千言

普緣塔

蹟今無考

何景明

石葢凌空起丹梯出翠微雲從珠頂覆燈轉鏡中輝雁沼  
波濤湧龍宮日月圍何能攀絕頂一覽漢邦畿



岐陽署中竹

明巡按御史李本固  
岐陽人

庭院青春靜幽懷自不任  
危欄閒徙倚綠竹共蕭森  
雨洗琅玕色風飄環珮音  
此君渾可對世事謾相侵

鳳翔道中山家

明茶馬傳振商  
汝陽人

徑仄疑無地山廻遠岸蒼  
白雲聞犬吠流水見人家  
版屋吹煙小柴門竹影斜  
狃狃饒古意不曉市朝譁

雨中武真庵督學招集東湖

國朝王士正

行人衣上雨來自杜陽川  
湖似郎官好名因學士傳  
有坡公祠

游儵爭唼雨垂柳欲生烟  
重過荷香裏還勞運酒船  
元次山詩



不能廢人  
運酒觴

再集東湖拜東坡先生祠

王士正

復有東湖約來當春暮時涼風散古柳微雨灑清池自識  
龜魚樂何殊濠濮思仙翁去千載髣髴下雲旗

東湖

國朝張鵬翮

東湖留勝蹟訪古一登臨月影銜珠閣松風奏玉琴山光  
檻外落柳色雨中深先正儀刑在憂民同此心

前題

國朝學訓孫爾思

偃仰平湖曲岑嵐一望收芰風清帶夏梧月澹澄秋船似



浮天過人疑入畫遊仲宣當此際不用賦登樓

前題

國朝朱熹  
潁陽人

東湖晴日麗載酒到孤亭水色風前碧山光雨後青時花  
非一態野鳥各殊形醉倚勾欄立渾如泛畫舲

授經臺

國朝王暉  
汝陽人

千載留經地相傳是此臺滋調三六劫呼吸五千灰寶籙  
春風永微言孽海開青牛南在望我馬恨虺虺

友人邀遊鳳女臺值雨不果

王璋

聞道鳳臺上雲深草木荒斷碑塵剝落古廟影滄桑方整



山陰興倏淹康樂裝世情那可定甘遜昔人狂

三良塚

國朝高登科寶雞人

既荷殊榮遇寧將軀命論野人知報德良士豈辜恩然諾  
杯中酒賡歌地下魂墓門臣主在俎豆共雞豚

前題

國朝劉震邑人

昔人從亂命高塚瘞三良霸國山河盡幽宮日月長碑殘

秋雨泐草盛墓田荒無限低徊意蕭蕭滿白楊

普門寺

原註九日游普門寺僧閣有懷子由○七言律

宋蘇軾

花開酒美曷不醉來看南山冷翠微憶弟淚如雲不散望



鄉心與雁南飛明年縱健人應老昨日追歡意已違不向  
秋風強吹帽秦人不笑楚人譏

大像寺

寺前有泉名虎跑一名金沙

蘇軾

金沙泉湧雪濤香灑作醍醐大地涼倒浸九天河影白遙  
通百谷海聲長僧來汲月歸靈石人到筇源宿上方欲續  
茶經校奇品仙瓢留待羽仙嘗

岐陽

宋元好問

眈眈九虎護秦關懦楚孱齊凡上看禹貢土田推陸海漢  
家封檄自天山北風獵獵悲笳發渭水蕭蕭戰骨寒三十



六峯長劍在倚天仙掌惜空閒

仲秋觀稼出郊遊大像寺

元廉訪  
副憲 胡居祐

禾黍秋成歲可觀登臨蕭寺倚空山寒雲滿岫天將雨幽  
鳥一聲僧自閒午枕齋魚驚客夢虛廊鐘磬度禪關普門  
祠下靈泉水流出餘波潤世間

和元胡廉憲遊大像寺

明孝廉  
秦 中 邑人

停輿古寺暫遊觀冷淡泉今冷淡山傳谷鐘幽伸佛教懸  
峯樹底養僧閒點埃不惹超凡夢五蘊皆空脫幻關自古  
禪林皆樂此西來旨趣異人間



送方上人一庵住大金佛寺

明刑部郎中

張文

淮南人

借榻叢林避俗諠  
袈裟延迓禮周旋  
文章愧我非韓愈  
風度憐公似大顛  
故國久懷飛錫去  
閒牕一任抱書眠  
何時淪茗重清話  
擬貢驪黃到日邊

前題

明禮部員外郎

周同伯

吉水人

日出金門鳳勅頒  
遠承恩渥住名山  
洗盂便問秦京道  
振錫先過函谷關  
萬事悉隨流水去  
一身常共白雲閒  
何年更理朝天屐  
重與譚空數往還

送大金佛寺方上人一庵還京

有引



庚寅孟冬予考績於京慶壽名利方上人屢謁予  
寓館相接良久知其慎重詳雅戒臘精嚴而所與  
遊皆名公也予竊敬之別去一載餘矣茲予巡行  
鳳翔上人飛錫於是一見忻然因其還京也呵凍  
走筆賦此爲贈

明學

伍

福臨川人

翻翻飛錫度烟霞隨處安禪卽是家身共浮雲寧有迹心  
同流水本無瑕真機靜處翻經葉別偈留來艷筆花回首  
金臺飛鳥外朔風吹雪點袈裟

送大金佛寺方上人一庵還京

明副使

梁

覲

東平人



鄉山掩映梵王家賜額頒來照綵霞翠竹黃花皆寓道寒  
潭夜月自無瑕栖心窅窅耽禪學飛錫翻翻望帝車歸到  
金臺春正好天香馥郁滿袈裟

前題

明郡丞劉璵雲間人

三乘了悟罷參禪來訪扶風古墓田自有慈航登彼岸不  
緣飛錫到西天緇塵盡掃靈臺淨色相俱空寶鑑懸歸觀  
龍顏殊有喜金襴重賜玉階前

前題

明蜀指孫閔淮右人  
揮同知

暫借禪房卧病身相逢似有夙生因葛藤斷去機緣息杖



履常來問訊頻，勘破佛乘空外月。  
笑拈優鉢劫前春，喜看飛錫金臺路。  
五色雲中拜紫宸。

與鳳郡鄉先生宴別兼諭父老 二首

明關西 高尚志 石首道人

清歌急管送金卮，仙侶星標盡漢儀。  
鳳去千年猶有象，芝生萬仞可充飢。  
漫將霖雨蘓來望，敢謂棠陰結去思。  
自是岐周風物好，不堪回首意遲遲。

馳驅三載忽南征，把酒臨岐感慨生。  
卻愧勞來虛漢使，喜看攀卧識周情。  
黃鶯百轉含離曲，細柳千條繞去旌。  
此別



應須頻繾綣何時重聽鳳來鳴

謁三公祠暨孔明橫渠配享

明御史御楊美益鄆縣人

辛從危構肅瞻趨異代簪紳會一區相業千秋崇厚報兵  
韜百將祖神謨蕭曹可失功難我濂洛同歸道不孤川嶽  
由來鍾聖哲誰云正氣獨今無

楊知江寅丈招飲東湖

明副憲許孚遠德清人

使君開宴鳳城東亭隱湖心一鑑空萬疊青山春雨外數  
聲黃鳥暮林中封疆正履岐周舊勲業何如旦爽雄醜酒  
臨流千古意坐來鄙吝已消融



東湖

明隴  
丁應時安邑人

如鑑湖光一望收  
况逢皓月轉層樓  
飛觴忽憶蘭亭約  
鼓棹還登赤壁舟  
萬里烟雲隨眼闊  
一時冠蓋快神遊  
更闌賸有尊芳興  
片葉須窮天際頭

前題

明邵  
蘇濬東萊人

鑑湖亭上暮烟收  
霽月浮光滿郡樓  
千載交情聯下榻  
一時豪客共登舟  
黃花香泛珍珠酒  
華髮榮分汗漫遊  
此夜須知興不淺  
任他鼓角急城頭

前題

明邑  
李榮平定人



宛在亭前暮靄收  
須臾明月遶層樓  
傳杯喜踐雷陳約  
擊楫還登李郭舟  
笑把茱萸重泛酒  
期開苒苒復來遊  
更闌不盡登臨興  
鼓枻須窮天際頭

前題

明邑令朱圻固始人

雲影徘徊一鑑空  
孤嵐山色映簾櫳  
波隨浴鷺搖仙舫  
歌雜絲絃吼樹風  
紅杏花飛雙岸錦  
蒼松翠拂晚烟籠  
金卮對酌情無限  
渾擬乘槎過斗宮

前題

明孝廉李貞邑人

鳳鳴樓下竹亭前  
苒苒雙頭各鬪妍  
對舞秋風驚渚鶴  
相



依月夜笑婢娟蓬壺浪說千年樹華嶽今開十丈蓮好取  
奇葩獻聖主豈容駢首老江邊

鳳湖雅會

有引

明左布政王體復

太平人

予爲水曹郎時知江楊公愛溪李公共事署中朝  
夕懽也萍踪間闊倏且十年矣今年楊公憲使關  
西予亦叨藩宣於此而李公由太守謝政家居鳳  
翔因得聚于郡之東湖開罇命酌話舊論心通宵  
不倦東方旣白鳴騶而散志之以詩

畫省爐香恍若蒸聯鑣記是十年曾還將鼓瑟逢楊意更



重修鳳翔縣志 卷之十  
許登龍御李膺病渴常思金掌露臨池共吸玉壺冰論心  
此夕成佳會不覺東方日已升

和前題

明副楊 楫  
憲 商邱人

燕樹幾年違畫省萍踪今夕集岐陽論文水部胸如斗授  
簡謫仙興若在綠水開軒金縷細青山八座漏壺長天邊  
正擬瞻奎聚霜角城頭報曙光

和前題

明孝李 貞  
廉 邑人

十年重會人如玉林下皤然鬢欲霜自愧新詩非李杜還  
推佳句屬王楊衝寒帶臘春將到秉燭圍爐夜未央倚檻



高歌清興極湖邊草木總輝光

憶梅

明進士 王麒原籍鳳翔

記得開時玉作神令人遙想見時真欲尋徑路慚無力若  
寫清寒便少人有夢遠馳芳樹草凝思徙倚畫欄塵暗香  
疎影今何處牕月魂招滿地春

東湖柳浪

王麒

風繞微波綠滿池倚風楊柳舞頻欹平湖分翠流春遠碧  
海籠烟上月遲藻面影開遊鯉散簑間弄歇野禽飛往來  
不盡停驂者到此乘薰襟欲披



玉窟流泉

王麒

一道清泉繞碧岑  
半山玉甃倚雲深  
草烟冉冉秋沉月  
石溜泠泠夜奏琴  
飲于猿來窺曲澗  
修翎鶴舞下長林  
分香也勝蘭亭水  
擊鉢傳杯放醉吟

國朝果親王鳳翔作

鸞鷟聲中揚玉鞭  
冰巒層疊鳳臺偏  
軒臣迎日曾推策  
禹跡開岐著導汧  
未暇八觀矜藻耀  
偶從三輔歷風烟  
黃沙何限前朝事  
記取斜暉嶺樹邊

鳳翔府

國朝王士正



城邊汧渭兩交流隴蜀中分第一州西雍橫當斜谷路南  
山高接杜陵秋雌鳴尚憶秦人霸星隕難銷漢相愁形勢  
依然身萬里扶風歌罷拂吳鉤

穆公墓

王士正

雨霽陳倉曉日紅杖藜來訪橐泉宮千年斷碣荒烟裏一  
片殘春秀麥中黃鳥哀時良士盡碧雞飛去霸圖空子車  
遺塚猶鄰近長與坑儒恨不窮

春日歸自東郊暫憩宛在亭

國朝王嘉孝  
邑令  
汝陽人

和風淑氣正深春乘興驅車到水濱斷岸高低圍綠樹廻



溪遠近出青蘋孤村擊鼓祈豐歲野老開樽洽比鄰  
執掌終朝憐俗吏暫時亭上對芳辰

秋日送客東湖

王嘉孝

蒹葭搖曳色蒼蒼步履湖邊對夕陽四壁清風披草樹  
一天爽氣到衣裳西岐勝地頻懷古上國嘉賓屢倒觴  
欲問離思何處是寒空嘹唳雁南翔

讀袁經畧傳

國朝王 暉  
汝陽人

大厦垂傾勢莫支感公隻手欲扶危揮戈督戰孤臣奮  
懷無安人王者師慕義直追拜疏日因風想見閉城時  
至今



坊表依然在愧殺如簧惜死兒

同人再遊東湖

王璋

楊柳陰中納遠涼蕭條此地亦湖光  
坐來蛙鼓聞聲細卧對荷風沁骨香  
遠近山光輝綠黛東西流水泛霞觴  
輕雲搖曳青天迥墅色行收入錦囊

讀劉侍御傳

二首

國朝朱

燮

頻陽人

錦水妖氛鬱不開  
豸冠誓死撥殘灰心馳北闕  
依明主魂赴西風向夜臺  
萬里橋邊秋鶴唳七星邨  
畔曉猿哀細吟遺事頻惆悵  
好把新詩和淚裁



憲節遙臨蜀道開時逢多難忍徘徊猖狂逆燄迷天日慷慨忠魂赴夜臺綿竹淒涼寒食火錦江蕭瑟杜鵑哀立功節君無愧爲訪遺編入史裁

東湖

朱燮

勝槩芳踪何處求東湖亭上景洵幽花光瀲灩流朝氣水色蒼茫照暮邱咫尺終南杯底現依稀赤壁畫中遊今宵若卧垂楊月應有羽衣掠客舟

李郡侯招飲東湖慶雨步韻

國朝進士劉自唐邑人

及時膏雨滿秦川太守湖邊慶有年漠漠山雲籠寶鬢涓



涓荷沼貼金錢昔人誌喜留臺榭此日勤民泛酒筵後樂  
先憂真刺史風徽寧讓大蘓賢

穆公墓

國朝周方炯南城人  
孝廉

霸業銷沉萬古餘當年園寢半邱墟秋風石馬城邊卧春  
雨農田墓下鋤三士於今同朽骨箇臣空自想遺書人間  
未見金鳧出猶勝驪山劫火屠

謁蘓公祠

國朝高登科寶雞人  
孝廉

蓋世才名久夢思城東迤邐拜靈祠一隄烟景欣無恙千  
古風流宛在茲廟裏龍蛇餘画壁門前鷗鳥漾蓮漪野人



擊鼓羞雞黍應自翩然駕赤狸

讀劉侍御傳

國朝孝廉劉震邑人

劍閣驅馳報主恩殺身取義更何論幾封諫草留天地一

畝荒邱付子孫碧血暫藏昭覺寺

公授命後殯成都昭覺寺

丹心長繞

杜鵑魂於今想像捐軀日颯颯寒風蜀北門

觀法駕自鳳翔回

五言排律

唐錢起

攬搶一掃滅閭闔九重開海晏鯨鯢盡天旋日月來聖情

蕓品物龍御闢雲雷曉漏移仙仗朝陽出帝臺周慚散馬

出禹讓濟川廻欲識豐人願南山舉酒杯



酬張少尹秋日鳳翔見寄

唐耿 漳

鼎氣孕河汾英英濟舊勛劉生曾任俠張率自能文官佐  
征西府名齊將上軍秋山遙出浦野鶴暮離羣遠恨邊笳  
起勞歌騎吏聞廢關人不到荒戍日空曛草木涼初變陰  
晴景半分疊蟬臨積水亂燕入高雲麗藻終思我衰髯亦  
爲君閒吟寡和曲庭葉漸紛紛

岐陽逢曲陽故人話舊

唐馬 戴

異地還相見平生分可知壯年俱欲暮往事盡堪悲道路  
頻艱阻親朋久別離解兵逃白刃謁帝值明時淹疾生涯



重刊鳳翔縣志卷之十  
故因官世業移雞鳴關月落雁度朔風吹客泪翻岐下鄉  
心落海湄積愁何計遣滿酌慰相思

會景亭

舊在城外  
南溪今廢

宋 蘓軾

飛簷臨古道高榜勸遊人未卽令公隱聊復濯路塵茅茨  
分聚落烟火傍城闌林缺湖光滿牕明野意新居民惟白  
帽過客漫朱輪山好留歸騎風迴落醉巾他年誰改築舊  
製不須因再到吾雖老猶堪作坐賓

讀袁經畧傳

國朝 朱 燮

明運當衰季綱常竟式微先生真慷慨視死有如歸集思



思廣益儲蓄判先幾撫摩期士奮調劑嘆難知人心忽渙  
散天意復相違一報疆城陷再報渾河危將軍多戰死大  
厦傾難支背城矢借一力竭淚空垂從容草遺表倉卒換  
戎衣丹心付烈燼浩氣貫陽暉燐火悲原草忠魂上帝畿  
我來讀實錄臣道昭來茲

關中比歲大旱人民播遷

皇上發太倉內帑賑窮困旣而給牛種蠲賦稅

命督撫大臣令有司勞來安集並勸墾督種

嘉孝壬申

冬來涖茲土次年麥始稍登秋獲大稔今歲大有秋



穀兩岐參岐者遍野萬姓感戴公建

萬壽亭於城東以爲歲時拜祝之地上下一體雖唐虞君

民無以過也

嘉孝

躬逢盛世恭賦二十四韻以附華

封祝之末

國朝

王嘉孝

汝陽人

熙世遭湯旱聖君邁舜仁皇華遶北闕丹詔下西秦欲濟  
凶荒地先須撫字人流離披疏上疾苦繪圖陳家賜常平  
粟人頒內帑銀漢文蠲國賦唐帝拯民貧寒谷生枯黍洪  
波起涸鱗恩流華嶽麓惠洽渭川濱綏理委卑吏指麾賴  
大臣扶藜歸故里築室洽比鄰驅犢開阡陌荷鋤芟棘榛



氤氲靈雨日披拂惠風辰烟火連山隩桑麻遍水濬兩岐  
占稔歲千畝粒承民已見倉箱盛行看積貯勻聖恩同覆  
載兆姓盡尊親卜地經營始建亭結構新丹甍停日月翠  
壁出風塵伏臘稱觴數耄倪拜祝頻三秦蒙再造四塞荷  
洪鈞比屋盈寧樂聯衡醉飽均周原仍熙熙禹甸自畇畇  
本固惟民富教興在俗醇小臣忻起舞國祚萬年春

鳳女臺

郡城東有鳳女臺碑○五言絕

唐岑參

秦女去已久仙臺在中岑簫聲不可聞此地留遺踪

三月三日遊元武山

七言絕

國朝李莪邑人進士



春風宕柳杏花天  
踏霧衝雲上碧巔  
暫得煩襟纔半展  
飄然便欲挾飛仙

勸農偶興

三首

國朝王嘉孝  
汝陽人

民質猶存俗未奢  
芒鞋白帽認田家  
犁雲鋤月春光永  
小麥青青大麥華

高下奔湍逐澗流  
山原錯落路悠悠  
於今聖代弘施濟  
環堵桑麻四望稠

和風搖曳菜花香  
隔樹聞呼布穀忙  
好把耕鋤酬地力  
行看婦子慶倉箱



